

東

華

錄

東華錄

雍正十

臣王先謙敬編

臣周綸蕃恭校

雍正五年丁未春正月癸巳康親王崇安等奏雍正四年十二月十六日至十八日黃河激清六百餘里實爲聖朝嘉瑞恭請升殿受賀得旨朕思上天之錫福降災卽如人君之賞罰也上天嘉佑示以休徵而承之者驕矜縱肆怠情前修則將轉福爲災矣若上天譴責示以咎徵而承之者戒慎恐懼省改前愆則將化災爲福矣天人感應捷於影響視其人之自取而天心仁愛雷霆雨露均屬成就之恩一如君臣上下之間用賞用罰無非曲成之使其遷善改過也朕事皇考四十餘年凡遇聖諭訓責嘉獎恩寵此心皆以恐懼儆惕處之一念愚誠深蒙皇考垂鑒御極以後

事天之心卽當日事 皇考之心也乃數年之中休徵疊見難以
悉數稽諸史冊咸稱福慶而朕受寵若驚不以爲喜實以爲懼蓋
恐前此之受貺無因而後此不能仰副也惟有君臣益加勉勵一
德一心恭承天眷昔 皇考臨御初年偶有一二災祲之事此特
兆三逆之變亂由於氣數使然而 皇考朝乾夕惕誠敬交孚是
以感格上蒼錫以多福四海甯謐厯數縣長此天道彰明較著者
也朕卽位以來敷政宣猷豈足當上天嘉貺惟有孝敬思慕 皇
考之心實爲誠切或者仰邀 皇考昭察代籲昊天默祈福祐從
前疊賜嘉祥今又有河清之瑞蓋許其已往而勉其將來也朕祇
承之下益深敬畏黽勉不遑若允行慶賀則沿襲頌美之虛文大
非朕戒傲之素志旣蒙 皇考錫以希有之瑞應告祭 景陵申
朕感激惶悚之誠至於上年朱家口河水潰決朕敕諭河臣悉心

修築今於十二月十三日決口合龍越三日卽有河清之應具見
河神福國佑民功用顯著宜崇祀典以答神庥該部察例具奏至
所請升殿受賀不必行○諭八旗官員兵丁等國用莫要於制錢
制錢充滿價值日平始於眾人生計有益今錢局每年鼓鑄並未
流通外省乃錢不加多而價值反覺昂貴皆因不肖之徒希圖利
息銷毀制錢製造器皿以至於此朕洞悉此等情弊爰降諭旨禁
用黃銅器皿令給官價收納此特爲爾等生計周詳籌畫理應欣
然踊躍各將家中所有黃銅器皿速行交出聞有經該管人員催
促不肯卽行交納者又有遷怒隱匿者是誠何意爾等有力之家
白銅紅銅鉛錫俱屬可用至中人之家簞器木器未嘗不適於用
而所需價值又復廉省爾等將黃銅器皿交納既可照常得價而
制錢漸漸加多充滿足用於爾等生計亦大有裨益今爾等隱匿

家中將來三年限滿發覺之日自干罪戾何如早爲交納以得官價乎是以朕復行降旨曉諭再滿洲風俗原以醇樸儉約爲上今漸染漢人習俗互相倣倣以至諸凡用度皆涉侈靡不識撙節之道因酌定品次以禁服色勒限一月令其各按品次著用諭旨甚明此特軫念八旗滿洲官兵如同保赤關繫尤切故曲爲籌畫或有無知之徒於已禁之後新製衣服誑稱禁前所製若如此則終無底止時矣人之尊榮不在衣服惟在各人行止蓋富足之人少而貧乏之人多旣已貧乏而強相倣倣則生計愈窘爾等與其爲衣服拮据倣倣豈若安守本分砥礪於技藝品行如果能奮勉得至官員大僚卽可服用矣凡官員兵丁所恃以謀生者惟在俸餉且各有應當之差若因製一衣服卽耗費數月之錢糧其日用尙能饒裕乎夫儉約爲持家根本不能節省於衣服等項焉能有益

於生理若能謹遵朕諭儉約自持不事奢靡濫用馴至比戶充盈
方感戴朕教養之深恩也著交與八旗該管處再行曉諭務使咸
知朕心各國儉約以副朕軫恤優待旗人之至意○乙未川陝總
督岳鍾琪奏普雄卽梁山東通烏蒙鎮雄西接建昌南連雲南北
達峩邊馬邊敘馬等營在烏蒙鎮雄恃爲退步者卽此地也其中
番族甚多而賊番金格等負隅抗拒從前調遣漢土官兵進剿金
格等逃匿山箐復遣建昌鎮臣趙儒化林協副將張成隆等會同
前往相機剿撫前後俘馘甚多所獲牛羊馬匹無算彼處番苗數
十餘族相率乞降鎮臣趙儒等隨加化誨令將逆首金格等拏獻
茲於十二月初三日逆首金格阿租已經擒獻并誘擒關壽一併
解省審究臣請仰仗 天威乘此勝兵將其餘番族一一招撫庶
可一勞永逸得旨賊番金格等依恃險僻肆行不法以搶奪爲生

且煽惑普雄一帶番苗負隅抗拒爲地方百姓之害其來久矣當日岳昇龍年羹堯亦曾奏請用兵征剿皆未擒獲渠魁使兇苗革心革面前歲因賊蠻阿底加巴等搶奪不法遊擊蘇凱差遣兵丁追捕賊眾聞風遠颺該弁將阿租之父姑姑踢打身死阿租遂與其叔金格挾仇報怨夤夜聚眾劫擄鐵廠民人又將營兵魏國臣綁去砍死以祭姑姑似此兇惡性成干犯法紀斷難寬貸是以朕允地方督撫提鎮之請令建昌總兵趙儒化林協副將張成隆等率領漢土官兵前往相機剿撫岳鍾琪悉心經理調度有方趙儒張成隆勇敢當先奉行得宜在事官兵當寒天冰雪之時不避險阻奮勇效力直抵普雄地方今據岳鍾琪奏報寨峒賊眾咸知畏威懷德悉就剿撫將賊首金格阿相關壽三人擒獲投獻等語渠魁既已伏辜其餘黨再加詳悉料理安插則從此番地甯謐居民

安堵甚屬可嘉岳鍾琪著該部議敘在事官員兵丁俱著加恩議敘賞賚○丁酉諭諸王大臣等朕每逢祭祀天氣必和霽去年冬至祭天蒙降瑞雪今日祭太廟又有微雪可爲豐稔之兆此皆天心默佑朕躬故於祭祀之日示以休徵朕心不勝欣慰然天庥滋至人事益不可怠朕又不勝兢惕也爾諸臣其共勉之○壬寅諭刑部向因年羹堯狂悖妄亂結黨肆行法難寬宥朕不得已將伊治罪又恐其黨援固結不散伊諸子留在京師或彼此暗相比附又生事端故令徙居邊遠之地遇赦不赦今見年羹堯正法之後伊平日同黨之人實皆悔過解散無一人比附之者而當日平定青海年羹堯亦著有功績著將伊子遠徙邊省者俱赦回交與年遐齡管束以示朕格外恩宥之至意○甲辰康親王崇安等奏先河道總督齊蘇勒奏報黃河激清嗣據漕運總督張大有河

南巡撫田文鏡副總河嵇曾筠陸續奏稱黃河之水自河南陝州至江南桃源縣約計二千里水色澄清略無沙滓據各處沿河官弁呈報自雍正四年十二月初九日起至二十九日河水悉皆澄清而嵇曾筠於本年正月初四日奏稱親勘河水澈澈如前是則河水澈清遠跨陝西河南江南山東四省之境經歷二十日之久誠亘古以來未有之瑞伏懇升殿慶賀以慰羣情得旨諸王公大臣等奏稱河水澈清二千里期逾兩旬爲從來未有之瑞懇請升殿慶賀朕嘗言天下至大庶務至繁斷非人主一身所能經理必賴內外臣工協力贊襄然後可以成一道同風之盛若上有涼德之主而下皆皋夔稷契之臣則工虞水火佐理有人政務亦不患其不舉若上有堯舜之主而下皆共工驩兜之輩則耳目股肱無所資藉政務亦必至於廢弛故人君之道以得人爲要而人臣之

道以奉職爲先此一定之理也朕統臨萬方雖刻刻有勵精圖治之念然必賴內外臣工共矢公忠各殫才力然後有實政實效及於吏治民生方可以感天和而錫繁祉不然則朕雖有勤政之念豈能事事躬親辦理也今見數年之中荷蒙 上天 皇考默佑疊賜嘉祥茲又有河清之上瑞朕細推天人感應之理自非無因當由內外臣工能體朕宵衣旰食之懷洗陽奉陰違之習分猷效職有數端之善上合 昊天 皇考之心是以錫茲福慶以勵將來爾等試再思之人事甫修僅有數端之善卽邀 上天 皇考之嘉貺若此儻能益竭忠誠事事皆善則其獲福又當何如或由此而侈然自足怠情前修則其獲譴又當何如可不慎乎可不懼乎况天道惡盈朕心方且因此益加戒敬所請慶賀典禮朕必不行朕念君臣之間實屬一體 上天 皇考旣垂訓於朕朕卽以

此訓及諸臣 上天 皇考既錫福於朕朕卽以此福及諸臣凡屬京官自大學士尙書以下主事以上內大臣都統前鋒統領護軍統領步軍統領以下參領以上凡屬外官自督撫以下知縣以上武官自將軍提鎮以下參領以上俱著加一級其王公等管理部院都統事務者應如何加恩之處著宗人府議奏自茲以往內外臣工當益加勉精白乃心和衷共濟矢勤矢慎秉公去私懷天鑒之匪遙念感應之不爽以至誠至敬仰承 上天 皇考之眷佑則受福孔多永永勿替矣勉之勉之○乙巳諭內閣從前奉天將軍蘇努等深負 皇考委用之恩於任內之事漫不經心內懷狡詐飾貌沽名將朝廷法紀滿洲制度盡行廢棄侵蝕庫帑虧空倉糧種種罪惡不可枚舉朕卽位以來雖悉心竭力整飭修治於今五年尙未就緒頃據噶爾弼奏稱盛京城內所有駐防兵丁

六千名節年俱各搬移城外或百里或五六十里居住等語夫以駐防地方之兵丁而聽其散處僻遠有此理乎皆由蘇努肆意擾亂國政嵩祝唐保住甘爲蘇努大馬曲意效尤所以二十年來流弊一至於此伊等之罪至爲深重盛京乃太祖太宗開基之地偏近福陵昭陵關繫甚鉅著將蘇努家產交與嵩祝唐保住查明再將伊等所有貲財俱帶往盛京以爲兵丁搬移入城之費如有應交與都統之處卽著交與都統令伊等效力贖罪六千名兵丁縱不能盡行移入但移二三千名伊等之罪亦可少輕若不悉心效力定將伊二人從重治罪○諭各省所貯倉穀原備歉年賑濟之用實百姓性命所關地方官員虧空倉穀者較之虧空銀兩其罪更爲重大是以朕卽位以來時刻以倉儲爲念總爲民命起見也雍正元年特頒諭旨令各省州縣於三年之內將所虧

倉穀悉行買補務期足數違者重治其罪嗣又屢頒諭旨諄諄申飭並諭各省督撫若所屬地方有不能如期補足情由亦據實陳奏乃江西巡撫裴率度奏稱江西倉穀俱已補足並無虧缺且有數人在朕前稱江西乃產米之鄉不必多貯穀石應將江西見貯之穀酌量減數糶賣者今據邁柱摺奏見在查出江西州縣倉穀虧空甚多是裴率度所奏顯屬徇隱欺罔而從前之奏稱江西穀石當發糶者想皆受裴率度之屬託欲借此以掩蓋江西倉穀之虧空耳又據邁柱奏稱見在清查倉糧請將存七糶三之例暫行停止庶免蒙混等語據此則江西從前之存七糶三不過借百姓之名以爲掩飾官員虧空之計非真有出陳易新之事也裴率度身任封疆大臣爲百姓所倚賴而忍以百姓性命所關之物化爲子虛使屬官得其利百姓居其名有是理乎原任布政使張楷陳

安策職司錢穀乃敢扶同欺隱以致倉儲虧缺若此從前裴律度摺奏力薦張楷陳安策而張楷陳安策來京陛見亦極口稱贊裴律度似此明係彼此徇情比附袒護屬員盜虛名而貽實患甚屬可惡陳安策著革職與張楷一同發往江西交與邁柱伊都立將虧空情由嚴加審訊裴律度亦著革職與伊等質審務將虧空之項徹底明白清楚儻張楷陳安策裴律度仍然欺隱含糊不得清結定將伊等在江西地方正法以爲私動倉儲輕視民命者之戒○諭戶部兩淮巡鹽御史噶爾泰奏稱乙巳綱商人呈稱感戴皇恩撫恤鹽課裕家足戶盈情願公捐銀二十四萬兩以充公用以達微忱等語朕軫恤眾商是以減除浮費加添鹽斤種種施恩之處無非欲使眾商均沾利益實本饒裕並不計其感激報效也伊等上年公捐銀兩朕因其旣已捐出難於退還故令卽於本地

方建立鹽義倉以裕積貯備地方之用今伊等又復公捐大非朕意但據噶爾泰所奏眾商情詞懇切著將此項銀兩令眾商各暫行存貯將來遇有公事動用之處再候諭旨或將此項任伊等資生利息亦從其便向後不必再捐又據噶爾泰奏稱眾商備伊公務銀八萬兩今一併交庫等語此係噶爾泰應得之項若有需用之處聽其自行支用伊若不接受任其退還眾商朕不收受聞得煎鹽竈戶皆居住濱海之地離城最遠一遇歉收之歲覓食維艱若遠赴鹽義倉領取米石恐窮民多往返之勞朕意應計地之遠近人之多寡酌立數倉於近竈之地積貯米穀以備貧苦竈戶一時緩急之用令誠實商人經管其事若遇歉歲卽以此爲賑貸之資濟其困乏著噶爾泰悉心經理卽於乙巳綱商人公捐銀兩酌量動用若干以爲建倉積穀之費並遴選商人管理務期實有神

益○命兵部尙書孫柱署大學士事○署湖廣總督福敏奏湖廣
苗徭地方不產硝磺而各案每以槍礮傷人明係奸民販買轉入
崗寨臣等正行嚴禁乃查舊案參革藩司張聖弼任內濫給硝磺
牌照甚多以致漢口經紀分然販賣至今尙有存貯前撫臣鄭任
鑰在藩司任內亦有伊戚林西周販賣雖經詳明督撫而違禁射
利殊玷官箴理合奏聞得旨鄭任鑰在學政任內頗有清名爲巡
撫時聞於應得之項亦不收受今觀福敏等所奏以硝磺違禁之
物令伊戚販賣且湖廣地方苗徭雜處例禁更嚴而鄭任鑰身爲
封疆大臣縱其私人犯禁取利是鄭任鑰之爲人於人所共知之
處則強制不取以沽清廉之名而於人所不知之處則暗中巧取
以遂其營私之實不知清廉之官當如是否耶彼意在於名實兼
收而不知其終歸敗露又如湖廣社倉一項楊宗仁殫心經理勸

導百姓勉力公捐以裕積貯而鄭任鑰身爲巡撫徇庇屬員聽其侵漁置之不問以致民間辛苦蓄積之物皆化爲烏有但知取悅於屬員不顧生民之緩急尙得謂之愛養斯民者乎鄭任鑰著革職在湖廣修理江岸工程處效力贖罪○丙午諭江蘇巡撫運米十萬石赴閩平糶○丁未命賚奉天黑龍江船廠三處將軍養廉銀各二千兩並發帑三萬四千兩分賜旗員○庚戌諭吏部內外各官皆有職業不可一日曠缺而大員尤爲緊要外省督撫在任丁憂者已令聽候諭旨到日方行離任嗣後三品以上京官升遷之日原任內若無同堂辦事之人仍令本人辦理俟爾部開缺奉旨補用人員後方行卸事其兼管別衙門者亦一體遵行庶職任不至或曠○刑部等衙門議覆禮部右侍郎塞楞額奉差審訊廣東駐防兵丁閻尙義等打毀米廠擁鬧巡撫公堂一案其爲首之

閻尙義陳顯聰及扎傷守備之譚英奇等均應擬斬立決爲從之
梁亞得湯亞四等均應擬絞監候原任廣州將軍李杕平時不行
約束兵丁臨時復向巡撫楊文乾求情釋放縱容曲庇明係擾亂
地方李杕應擬斬監候從之○辛亥諭火器營大臣等火器營甚
屬緊要馬上教習熟練方爲有益凡屬滿洲以騎射爲根本不可
專習鳥槍而廢棄騎射須在馬上射箭放槍著令兵丁加意熟習
再兵丁內有自己養馬學習鳥槍技藝及勤謹效力當差者爾等
卽當獎勵以優等記名其或行走不及者當誘掖勸導蓋教訓兵
丁須如父兄之於子弟不可遽加呵責若有下愚不移之人或經
再三教訓終不悛改仍然行止妄亂者豈可留之京師爾等當卽
行奏聞發遣爾等凡遇官兵齊集訓練之處將朕諭旨諄諄勸誘
明白曉諭○壬子雲南總督鄂爾泰遵旨議奏候補通判管席條

陳事宜一漢奸宜禁查邊境逞兇莫如頑苗而頑苗肆惡專仗漢
姦苗之族類甚繁凡黔粵四川邊界所在皆有今安設營汛兵苗
錯處之地雖不能禁漢民之不相往來而劫殺之風自可少息其
餘無營汛之寨原不許漢民雜居借貿易之名巧爲勾通自宜嚴
行禁止舊議以拏獲川販十五名准予該管官紀錄一次夫川販
漢奸潛匿兇寨拏獲甚難又多由外結不行報部故雖有鼓勵之
典而踴躍效力之員甚少請嗣後凡有擒獲奸販審明實有通同
劫殺情罪每擒獲一起卽予紀錄一次一切劫殺案件不得外結
有告首奸販情實罪當者每獲一人賞出首人銀五兩但不得挾
仇射利如虛反坐一藥箭宜禁查兇苗所恃惟有兇器臣自親往
長寨已將定廣各寨兇器查繳惟是熟苗查繳頗易生苗查繳甚
難若盡收熟苗之器械必轉受生苗之摧殘則外侮之來反無以

抵禦不可不慎今擬嚴定規條一切兵器止許收藏在家以防賊盜其有萬不得已之事必欲攜帶夜行者給以號票每過塘汛盤驗放行至藥箭多自川粵而來見已密訪飭拏此風少減總俟兇惡土官盡歸法度則此患可絕一倉穀宜積查積貯之法穀原勝米然實心任事存乎其人每見一經官糶則徒飽吏胥民不沾惠輕斗糶出重斗糶入官價減而民未受減價之利官買穀而民實受買穀之害此弊江浙爲甚雲貴亦然臣自莅滇以來凡銀折印借民欠勢壓等弊漸次禁止其有虧缺勒限完補已各知儆惕至於米應易穀雖經通行猶未畫一俟各倉清楚少待秋成可以就緒一黔省鼓鑄宜開查黔省地瘠民貧輕戥湖銀所在通行若換制錢必須加戥折色甚以爲苦况兇苗錯雜見財殺人往來行客尤不便帶錢而開採礦廠動聚萬人油米等項少不接濟則商無

多息民累貴食一旦封閉而眾無所歸則結夥爲盜不可不慎臣愚以爲不如開墾田畝多積米糧使油米價賤則開採不難今猶未敢輕議也奏入報聞○甲寅以永壽爲禮部右侍郎

由副都統遷

○

乙卯諭內閣地方水利關係民生最爲緊要如江南戶口繁庶宜更加修濬時其蓄洩以防旱澇向來屢有條奏之人但未經本省督撫奏請朕意亦久欲興修以資農務因海塘工程正在營治且水利事關重大必得實心辦事之人方有裨益卽如目今畿輔水利賴有忠誠任事之怡親王始可興此大工不然則亦未敢輕易遽行也我皇考念切民依周知稼穡康熙四十六年巡省江浙所至必細驗水土燥濕高下之宜詳考五穀種植之性躬親講求將附近太湖及通江湖之處條分縷析特頒諭旨令江浙督撫於蘇松常鎮杭嘉湖地方疏濬河港以資灌溉修建閘座以便啟

閉皆動用公帑錢糧不使絲毫出於民力恩至渥也乃當時督撫諸臣不能實心仰體惟以虛文奉行糜費帑金二十餘萬大都飽於官吏之侵漁而無實效深可痛恨朕卽位以來事事仰繼 皇考之貽謀永圖民生之遠計本欲俟直隸水利興修之後令怡親王前往江浙相度情形商酌興修之舉今巡撫陳時夏特行奏請且稱費用不過十餘萬兩卽可成功據陳時夏陳奏應是地方不可遲緩之事副都統李淑德昔任江南松江府同知諳悉水利事宜曾經條奏頗爲明晰原任山東巡撫陳世倌年力精壯見在間居著李淑德陳世倌會同巡撫陳時夏總河齊蘇勒總督孔毓珣悉心踏勘詳加酌議儻河工緊要齊蘇勒不能親身前往卽行商酌定議具奏凡建立閘座疏濬河流務期盡除淤塞以杜泛溢之虞廣蓄水泉以收灌溉之益其一應公費俱動用庫帑支給一切

工程交與李淑德陳世倌監督辦理並諭吏部將各部見任司員
候選司員及府州縣人員內有具呈願往效力者挑選十餘人帶
往江南不必令出貨財惟令辦理事務交李淑德陳世倌二人酌
量委用○致仕太子少傅文淵閣大學士高其位卒遣簡親王神
保住奠茶酒○丙辰諭內閣太常寺卿鄒汝魯進河清頌內有舊
染維新風移俗易等語朕御極以來用人行政事事效法 皇考
凡朕所行政務皆 皇考已行之舊章所頒諭旨皆 皇考已頒
之寶訓初未嘗少有所增損更張也朕已屢行曉諭中外大小臣
工無不知之今鄒汝魯所云舊染維新風移俗易不知其出自何
心亦不知其有何所指且所移者何風所易者何俗舊染者何事
維新者何政且書經成語舊染污俗咸與維新此處豈可引用耶
鄒汝魯前在奉天府尹任內並不實心供職諸事怠忽聲名亦甚

平常來京陛見條奏數事皆屬荒唐不可行之事因轉用爲太常寺卿朕見伊言動舉止知非端方之人又因伊弟縱容家人生事被參革職伊心懷怨望形於顏色今茲河清之瑞朕並未令臣工進獻詩文鄒汝魯若不善文詞原可不必陳獻乃於所進冊葉出此悖謬之語顯係譏訕甚屬可惡著交與九卿公同嚴審定擬具奏○以沈近思爲左都御史仍兼理吏部侍郎事○丁巳議政王大臣等議覆副都統宗室鄂齊奏西藏首領辦事之人互相不睦達賴喇嘛之年紀尙幼未免有偏向伊父索諾木達爾扎之處康濟鼐爲人甚好但恃伊勳績輕視眾噶隆爲眾所恨阿爾布巴賦性陰險行事異於康濟鼐而索諾木達爾扎因娶隆布奈二女三人合爲一黨若挑唆達賴喇嘛與康濟鼐不睦必至爭競生事再噶隆甚多反增煩擾隆布奈行止妄亂扎爾鼐庸懦無能應將此

二人以噶隆原銜解任則阿爾布巴無人協助自然勢孤無作亂之人矣請降訓旨曉諭達賴喇嘛康濟鼐阿爾布巴等和好辦事均應如所請遣大臣一員齎旨前往曉諭令伊等和好辦事再達賴喇嘛母舅袞都阿喇木巴既誠心守護應給與達爾漢之號賞段六匹得旨著內閣學士僧格副都統馬喇差往達賴喇嘛處各賞銀一千兩○戶部議准江蘇巡撫陳時夏奏江南省二十三衛向隸都司轄今都司已裁其徵收錢糧盤查倉庫應歸附近之府州專轄結報請將上江之新安等衛歸徽州等府轄下江之蘇州等衛歸蘇州府轄江淮興武等衛歸江甯府轄從之

二月戊午朔宗人府遵旨議奏前因黃河激清奉旨將管理部院都統事務之王公一體加恩查王公無加級之例應各與紀錄一次得旨依議王公紀錄一次著准算俸二年○庚申 上以直隸

總督宜兆熊劉師恕參奏原任總督李紱彌縫虧空一摺出示大學士九卿詹事科道等諭凡汝等科甲出身之人朕因其較之捐納人員目不識丁者不同所以欲加任用若盡如李紱鄭任鑰等之營私作弊轉不如非科甲之人矣汝等宜思天人感應之理絲毫不爽果能至誠秉公致朕於堯舜之君朕必委曲保全益令爾等爲臬夔稷契之臣將唐宋元明積染之習盡行洗滌則天下永享太平卽爾等子孫亦蒙其福朕所以誨諭諄諄者蓋欲諸臣屏去虛文崇尚實政以仰答天眷耳且朕亦並非謂已治愈求其治也爾等試思今天下之大果事事就理耶爾等讀書原欲致君澤民建功立業流譽於無窮但功名富貴是有命焉不可倖而致也卽禍患災難亦有命焉不可倖而免也但當誠意正心竭盡忠盡以爲立身事君之本而已朕所以誨諭諄諄者實欲國泰民安眾

共受福朕之所爲並無成見不過渴飲而飢食夏葛而冬裘光天
化日因物而施耳見今黃河激清朕實不敢以爲瑞愈滋恐懼修
省之心也○諭雲南貴州四川廣西督撫提鎮等狎苗素稱兇悍
加以漢姦販棍潛藏其中引誘爲惡以致燒殺劫掠毒害良民居
民深受其擾今督臣鄂爾泰等奉旨剿撫業已擒獲兇苗販棍正
在撫恤地方籌畫久遠之計朕聞滇黔蜀粵四省接壤之區搖裸
雜處不時統眾越境讐殺攪害鄰封地方文武官員往往以責任
不輕彼此推諉苟且因循以致塵案莫結者甚多此天下之共知
共聞者如廣西西隆州古障地方土目王尙義等與貴州普安州
捧鮮地方之苗目阿九等互控一案遷延數年之久尙未審理朕
已降旨督責此卽其明證也况各省所設汛防在於腹內而搖裸
則環居腹外防範難周遇有殺掠必待事主稟報始行追捕往返

耽延兇徒已遠遁矣四省督撫提鎮宜各委賢員於四省接壤之地勘明界址凡徭徠販棍往來要路設立營汛派撥遊守各官帶領弁兵駐防稽察儻有越境讐殺劫掠之事即時禽解不使漏網其委防弁兵以一年爲期卽於四省附近營伍內輪流撥換如一年之內無越境生事之人及有而能逐名拏獲者四省督撫提鎮會同保題從優議敘兵丁量加賞賚儻有貪功生事騷擾地方者立即題參從重治罪○辛酉諭內閣九卿前據李紱奏稱田文鏡欲監斃黃振國以滅其口等語著將黃振國再行細訊田文鏡有何不公不法之事爲黃振國挾制而必欲制之死地以滅其口黃振國係必應正法之人此時有何顧忌田文鏡若果有不公不法之事著伊據實供出並不因其供出田文鏡之短方行正法亦不因其不供出田文鏡之短遂可邀寬減也據黃振國供稱伏讀上

諭說黃振國之罪不至斬決可見皇上至聖至仁原不要殺我是李紱蔡珽謝濟世三人要殺我等語朕前謂黃振國之罪不至於斬決者乃謂從前田文鏡參劾之案其罪本不至於死地及被參之後蔡珽爲之黨護李紱爲之陳奏謝濟世又爲之翻案鉤結黨援造作蜚語擾亂國政誣陷大臣爲世道人心之害所關甚大是黃振國之罪雖服極刑而有餘尙得謂之罪不至於死乎但其所以至此不可赦之死罪者實由蔡珽李紱謝濟世三人成之也著並諭黃振國知之○內閣九卿翰詹科道議奏江西考試官查嗣庭俞鴻圖收受舉人牌坊銀兩除查嗣庭大逆不道另案歸結其巡撫汪澂布政使丁士一副考官俞鴻圖應按律治罪得旨舉人牌坊銀兩分送主考官向來亦相沿行之尙非贓銀之比但謂主考應該收受亦非也汪澂之過在於身爲封疆大臣而與欽差主

考爲房屋交易之事應加處分以儆將來但其爲人尙老成著降四級以京員調用丁士一由部曹擢爲御史朕特簡任巡臺御史隨升福建按察使又升江西布政使伊受朕格外擢用之恩當於地方一切有關國計民生之事悉行奏聞方是乃丁士一負朕深恩並不實心效力其在福建時阿附滿保黃國材於地方積弊多端俱行隱匿並不陳奏及至江西又阿附裴率度且以布政使職掌之錢穀任各州縣處處虧空置若罔聞既不稽查又不揭報其扶同徇隱那移侵蝕之罪顯然著革職發往高其倬處或有應修城工或別有地方工程派伊出貲效力儻不盡心效力定行從重治罪俞鴻圖著革職在翰林院編修內行走儻三年無過准其開復至查洞庭俞鴻圖名下追出收受牌坊銀兩既非贓銀不必入官俟江西會試舉人來京應試後無論中試不中試者俱按名散

給○定湖南改歸貴州之清浪平溪二衛屬思州府轄○吏部題
戶部尙書蔣廷錫丁母憂請解任守制得旨蔣廷錫著給假數月
奉母櫬回籍喪葬事畢回京在任守制辦事○壬戌賑江南江甯
淮安等縣衛水災饑民○朝鮮國王李昉遣使臣表謝改正伊祖
李倬被誣史書恩並獻方物得旨著將方物交內務府准作五年
正貢○癸亥諭兵部水師甚屬緊要見今天津設立水師令滿洲
官兵操練學習其江甯駐防滿洲官兵亦應照天津例設立水師
將領江水師見有船隻酌量撥給江甯將軍令其學習操練○以
湖北按察使蔡嵩爲太僕寺卿○允楊文乾給假葬親調常賚署
廣東巡撫由福建調○甲子諭內閣三月十八日爲 皇考聖祖仁皇
帝萬壽聖節舊例於是日虔誠齋肅禁止屠宰今應永遠遵行
至聖先師孔子師表蒞世八月二十七日爲聖誕之期亦應虔肅

致敬朕惟 君師功德恩被億載普天率土尊親之戴永永不忘

而於 誕日尤當加謹以展恪恭思慕之忱非以佛誕爲比擬也

著內閣九卿會同確議具奏尋議 先師聖誕應致齋一日不理

刑名禁止屠宰得旨是○以王肅章爲湖北按察使

由給事中遷

○戶

部議覆怡親王允祥等奏水利營田修治如式者請交與地方官

收管定其考成載入計典其畸零閒曠之地與各處河隄俱令地

方官訓飭農民栽種樹木以護隄根以盡地利並將植過樹木若

干冊報本管上司不時查視應如所請得旨依議修舉水利種植

樹木等事原爲利濟民生必須詳諭勸導令其鼓舞從事方有裨

益不得繩之以法若地方官員因關繫考成督課嚴急則小民轉

受其擾矣著直隸學臣轉飭教職各官切加曉諭不時勸課使小

民踴躍興作若地方官員怠忽不加勸導或有逼勒過嚴者著學

臣稽察奏報三路巡察御史亦著善爲勸導悉心稽察如地方官有奉行不善之處卽行據實奏聞○禮部題黃河激清應遣官告祭江南清口河神並懇 御製碑文昭垂永久其武陟縣河神廟亦應一體告祭勒碑從之○署湖廣總督福敏奏請動用耗羨銀兩修築荊州府江陵監利松滋等縣沿江隄岸得旨據福敏奏稱荊州地方沿江隄岸例係民隄民修今請動用耗羨銀兩修築令監修官防護朕思耗羨銀兩亦係小民脂膏凡地方應修工程於民生實有裨益者卽當動用帑金辦理不必取給於耗羨此處既係民隄若修理之後卽算欽工則凡遇隨時補葺之處小民不敢干涉轉致疏忽且恐頑劣之民恃有朝廷歲修之例不肯用心防護以致潰決害及田廬而民受其累此等處皆當豫爲籌及荊州沿江隄岸著動用帑金遴委賢員監督修理修成之後仍算民隄

令百姓加意保護隨時補葺俾得永受其益○署廣西巡撫韓良輔奏天河縣獄內拘禁莫東旺一名係李紱批飭枷責追贓結案之犯乃遷延一載尙未發落以致蠻獠糾集多人推倒土牆將莫東旺搶去得旨此係李紱甘汝來任內之事伊二人身爲封疆大臣此等細事不能早行完結遲延日久以致蠻獠敢於妄行有關國體著將韓良輔奏摺發與李紱甘汝來看令二人明白回奏尋李紱甘汝來遵旨回奏得旨據李紱奏稱莫東旺一案經臣審結臣卽起身赴直隸新任其因何遲延一載尙未發落之處無由得知等語夫舊令尹之政必以告新令尹古人於罷官之後尙以國事爲念豈有李紱升任總督不將此事明白交付接任巡撫屬其早行完結之理著將李紱甘汝來交部察議具奏○乙丑諭大學士九卿等廣東巡撫楊文乾條陳廣東事宜三件一係肇廣二府

修築園基之事據楊文乾奏稱頂衝之處必須用石工修築方能永久約計各項工程非數十萬金不可據阿克敦摺奏則云本地百姓言土隄易於修理若用石工將來民間力量不能修補轉於地方無益是以會彙時未曾列名等語據此則二人意見不同其應如何修理之處難以遙定俟孔毓珣楊文乾到京時令九卿會同確議具奏一係廣東積貯倉穀之事據楊文乾奏稱廣東一歲所產米石卽豐收之年僅足支半年有餘之食合計通省須積穀四百餘萬石等語夫本省所產之米不足供本省之食在歉年則有之若云每年如此卽豐歲亦然恐無此理朕思廣東之米所以不敷廣東之用者或田疇荒廢未盡地利或興作怠惰未用人工或奸民貪得重價私賣海洋三者均未可定每年漕運進京之米亦不過三百餘萬石以廣東一省而積四百餘萬石之穀爲數太

多難於查覈而又當嶺南潮涇之地能保無黴爛之虞乎今廣東各屬見報存倉之穀一百六十餘萬石去冬又令廣西運穀三十萬石以備廣東之用是廣東已有穀一百九十餘萬石若此數實貯在倉則一時需用儘足支應不慮匱乏矣一係請開捐納以築國基以備不虞積貯之事既爲地方需米起見一開捐納則米價反致昂貴於民不便故上年冬底爲廣東籌畫積貯九卿議開運穀捐監之例其所以令其運穀者卽是此意若云開捐收納銀兩再委員採買於鄰省則何不動用庫帑採買而必廣開事例乎况廣東既有運穀捐監之例則將來米穀自然日益加多想楊文乾具本時尙未知運穀捐監之議也以上二事亦俟孔毓珣楊文乾到京之日九卿會同定議具奏至廣西撥運廣東之穀三十萬石仍遵前旨卽速運送○刑部等衙門議覆太常寺卿鄒汝魯身爲

大臣乃於進獻河清疏內故用悖逆之語顯肆譏訕請革職照律擬絞立決得旨鄒汝魯著革職從寬免死發往湖廣荊州府沿江隄岸工程處效力○丙寅諭內閣浙江杭嘉湖三府上年秋冬之間雨水稍多收成略歉今年青黃不接之時已令地方官商酌平糶以濟民食但念米價雖不至昂貴而無力窮苦之民本無糶米之資甚屬可憫著動用庫銀四萬兩令巡撫李衛會同將軍鄂彌達觀風整俗使王國棟悉心商酌於地方或開濬河道或修理城垣隄岸令小民就近傭工藉以餬口儻四萬金尙不敷用著李衛等再行具奏請旨○刑部遵旨議覆直省盜案嗣後州縣以至巡撫務嚴行究審將法所難宥及情有可原者一一分晰於疏內聲明照律不分首從擬斬立決具題大學士會同三法司仍照從前將應正法應減等發遣者分別詳議請旨其應發遣者改發內地

三千里撥入驛站及營兵差使仍交與該管官員不時查點管轄毋致脫逃得旨緝盜乃安民之要務兇暴不翦則善良不獲甯居故立法不容寬貸止因同夥多人其中原有被人誘脇而非秉性奸回屢行劫奪者朕仰體 聖祖仁皇帝好生之仁施恩法外必須各省督撫大吏實心奉行分晰至當使積賊大盜不至漏網方爲用法之平儻姑息養奸意謂多寬一人即可造福是乃縱盜殃民其造作罪孽更甚於嚴厲苛刻者嗣後督撫所議減等之盜犯儻至發遣之處怙惡不悛一經發覺定將原議之督撫從重議處○封哈密扎薩克達爾漢伯克額敏爲鎮國公賞銀一千兩其下種地回民四百人各賞銀兩布匹以口外開墾著有成效也○丁卯 上啟鑾謁 陵○庚午 上謁 昭西陵 孝陵 孝東陵回鑾○壬申刑部議准直隸總督今授工部侍郎李紱奏保定府

理事同知職任繁劇請將河間府及天津州所屬十八州縣旗民大小案件改歸新設之天津州理事同知就近管轄從之○癸酉諭內閣朕聞陝西鄭渠白渠龍洞渠向來引涇河之水溉田甚廣因歷年既久疏濬失宜龍洞與鄭白渠漸至淤塞隄堰坍塌醴泉涇陽等縣水田僅存其名深爲可惜特令該督岳鍾琪詳酌興修今據該督親勘奏稱龍洞急當挑挖鄭白渠務當疏濬更須修築隄堰建設閘口以俾堅久已於西安布政司備公羨餘銀內先動一千兩委員將龍洞鄭白渠及時挑濬其建閘工料約估銀七千兩請亦於司庫存貯羨餘銀內動用等語朕惟興修隄堰乃於民生大有裨益之事著動用正項錢糧俟一切工程告竣造報工部查覈務期渠道深通隄堰堅固俾農田得以永賴以副朕保惠元元之至意○甲戌 上還京師○加福建興泉道巡海道銜移駐

廈門改臺廈道爲臺灣道添設臺灣府通判一駐澎湖裁澎湖巡檢一○乙亥河南巡撫田文鏡奏請將候選州縣分發各省學習以裨吏治諭此議朕於踐阼之初業經思及因難以施行遂寢而未發蓋自古迄今大抵中材居多欲求出類拔萃之賢世不屢覩故理國之道貴儲材有素首先以厚風俗爲要務風俗旣端斯趨向有方而人才蔚起不特科甲輩學古入官卽一切旗漢人員宜無不講求經濟吏治民生豈盡茫然莫喻但恐其居心不肯恪秉公忠以奉乃職耳若慮以民社爲新進後生所嘗試之具粵稽舜典明試以功車服以庸已啟後世科資循格之端是以地方外吏全賴守封疆者激揚公正糾舉精明正所謂三載考績黜陟幽明也至云新選者少則數月多則經年安保其無害於民今學習之員不令攝事無由覈驗優劣委令署理彼僉邪小人之爲害於民

又獨不然乎況督撫諸臣雖簡命自朕未必一皆公爾忘私或稍涉資緣則大啟奔競其弊有不可勝言者不甯惟是卽朕見今用人之法亦止堪暫行一時將來自仍歸於聖祖疇昔銓衡之成憲朕緣目擊官常懈弛吏治因循不得不大示鼓勵以振作羣工委靡之氣俟咸知奮勉治行改觀時朕另有裁處又據稱朕超擢教職爲州選舉生員爲縣雜職亦准卓異試觀如是甄拔才堪入彀者能得幾人此亦出於偶爾旁求非可永遠循行之良策所以吏兵二部向年舊例悉仍舊貫未命更張一二間遇督撫越例題請補授亦俱令聲明原委朕降特旨允行蓋有深意存焉豈必俾輕棄成憲而致一代典章混淆無序哉○以王克莊爲太常寺卿黃烺爲湖北布政使由副都統通○解揚名時任以朱綱爲雲南巡撫調漆紹文爲湖南布政使以張坦麟爲江蘇布政使山兩淮鹽運使遷○

丙子以祖秉圭爲貴州布政使馬世珩爲安徽按察使

由江安糧道遷

○

丁丑江西巡撫汪瀛奏江西地方舊有落地稅白潢爲巡撫時將稅銀裁革不令商民完納而以巡撫司道公捐銀兩代完每年假造花名冊籍報部其舊有收稅大使等官仍設立如前接任巡撫王企靖裴律度皆照白潢之例行應請批示遵行得旨國家經制錢糧豈臣子可以意爲增減若江西此項稅銀不應徵收則白潢應奏請於聖祖仁皇帝施恩豁免若係地方應徵之項則自應令商民完納何得將公捐銀兩代商完課曲市私恩以博無知小人之稱頌並不計及將來之可永行與否且此端一開他省督撫何以催辦國賦似此飾詐沽名豈人臣事君之道且江西近日參出虧空甚多皆由白潢當日徇情市恩苟且姑容所致至於汪瀛身爲巡撫凡事不能據理而行乃將白潢所行悖理之事奏聞冀

朕批示朕若批令將稅銀豁免則是國家之經費 聖祖仁皇帝六十餘年所未免者而朕安能任意輕免之耶若批令仍向商民徵收則是白潢已免之項而朕復行徵收無知愚民豈不歸怨於朕若批令照白潢之例以公捐銀兩代商完課則國體何在有此治天下之道乎○戊寅以甘汝來爲左副都御史實授韓良輔廣西巡撫○改湖南五寨司吏目爲巡檢○命給事中黎致遠往江南稽察河工○庚辰諭內閣敬覽 聖祖仁皇帝實錄內康熙五十一年五月二十日奉 旨山東人出口種地者多至十萬有餘伊等皆朕黎庶旣到口外種地生理若不容留令伊等何往但不互相對閱查明將來俱爲蒙古矣嗣後山東民人有到口外種地者該撫查明年貌籍貫造冊移送稽查由口外回山東去者亦查明造冊移送該撫覆閱稽查則百姓不得任意往返而事亦得清

釐矣朕披讀之下仰見我 皇考聖慮周詳撫民懷遠之至意此事今尙行否其直隸山西民人有往口外種地者亦照此例行否著大學士等查奏尋奏查康熙五十一年四月內曾奉 聖祖仁皇帝諭旨古北口六路種地民人酌設副將同知管理嗣經九卿議停未曾舉行至雍正元年二年三年陸續添設古北口張家口歸化城同知各一員與 聖祖當日諭旨早已符合但口外地方遼闊各該同知所轄恐有遺漏之處應令直隸山西督撫查明酌量分交管理並嚴飭三路同知各案所管地方將見在寄居民人與種地民人查明姓名籍貫造冊咨查各本籍仍令各省州縣官將所有出口種地民人記檔以備日後查對嗣後再有出口種地之人俱著該同知一面安插一面移咨本籍查無過犯逃遁等情准其居住耕種年終造冊報部從之○辛巳甘肅巡撫石文焯奏

世襲一等精奇尼哈番趙之璧應賠伊父趙弘燮贓銀並不依限
交納應革去世職嚴追還項得旨趙良棟宣力疆場勞績懋著是
以 聖祖仁皇帝將趙弘燮等加恩擢用畀以封疆重任乃趙弘
燮深負高厚之恩居官貪劣贓私纍纍其名下應追各項銀兩本
應將趙之璧革去世職嚴追完項但朕念趙良棟昔日功勳格外
施恩及其後裔著將趙之璧從寬免革職銜其應追銀兩亦著免
追留與伊等養贍以示朕優眷功臣之至意所有承追督催各官
亦免查參○甲申 上御經筵○乙酉諭內閣廣西巡撫韓良輔
奏稱廣東地廣人稠專仰給廣西之米在廣東本處之人惟知貪
財重利將地土多種龍眼甘蔗煙葉靛之屬以致民富而米少
廣西地瘠人稀豈能以所產供鄰省多人之販運等語此奏與朕
前旨相符可知閩廣民食之不敷有由來矣著兩省總督巡撫等

悉心勸導俾人人知食乃民天各務本業盡力南畝不得貪利而
廢農功之大不得逐末而忘稼穡之艱至於園圃果木之類當俟
有餘地餘力而後爲之豈可圖目前一時之利益而不籌畫於養
命之源以致緩急無所倚賴而待濟於鄰省哉假使鄰省或亦歉
收則又將何如哉該督撫等務須諄切曉諭善爲化導俾愚民豁
然醒悟踊躍趨事則地力不至虛耗而米穀不至匱乏矣每見各
省督撫大吏皆各私其所轄之地方而於鄰省休戚膜外視之如
高其俦則請運江南之米於福建而陳時夏又欲留貯於江南楊
文乾則欲運廣西之米於廣東而韓良輔又欲留貯於廣西伊等
各從疆界起見甚屬褊小朕君臨萬方普天率土皆吾赤子一省
米穀不敷自然接濟於鄰省有無相通古今之義若封疆大吏各
據本地實情奏聞則朕易於辦理儻各存偏向本省之見不肯通

融接濟則朕辦理甚難若開捐納以積穀則地方米價必致高昂若截漕米以濟民則天庾所關更爲緊要展轉思維實無善策是在凡爲督撫者體朕一視同仁之意酌地方之緩急爲有無相通之道勿以彼此隔屬有心區別如此方不愧大臣公忠之誼而於國家懷保小民之治大有裨益也○丙戌諭內閣前鄂爾泰會奏稱廣西泗城土司甚屬不法素爲民害請敕令廣西巡撫提督懲治朕曾降旨詢問韓良輔據韓良輔奏請欲往雲南與鄂爾泰面加商酌朕思此事甚有關繫非韓良輔與鄂爾泰面議不可昨都察院奏原任廣西州判程旦控告羅文剛一案羅文剛統眾肆惡吞噬十一處邨落竟敢與官兵相抗不容設立塘汛李紱身爲封疆大臣遠巡畏縮苟且彌縫但爲掩飾一時之計而於地方之利害民生之休戚毫不關心甘汝來時爲臬司亦因循怠忽不能整

頓昨令廷臣詢問二人俱俯首無詞李紱甘汝來相繼爲廣西巡撫著二人前往廣西辦理土司之事從前疏縱之兇徒羅文剛等著卽交與李紱甘汝來速行擒獲不得容其免脫韓良輔前往雲南與鄂爾泰會商時著李紱一同前往將副將張傑調至省城署理廣西提督李紱一到同韓良輔卽起身赴滇韓良輔起身後巡撫印務著甘汝來署理前朕准給韓良輔假期送其母輓回籍著俟公事定議後伊酌量起身李紱甘汝來負朕擢用深恩今加寬宥容其效力贖罪務將廣西境內不法之苗夷與地方不法之奸民悉心料理俾盡革兇頑遵奉國憲以安良善以靖地方儻目前疏縱之羅文剛等不能擒獲及伊等料理土司之事虛文掩飾以卸目前之責將來仍有兇苗妄行干犯王章者定將李紱甘汝來從重治罪又如礦賊盤踞兩廣之間而兩省官員互相推諉以致

宵小肆行良民時受其擾著李紱甘汝來會同阿克敦將兩省疆界一一清查分別防範管理使汎地各有專責匪類無計潛藏不得仍前怠忽自干重罪若泗城土司怙惡不悛有應行用兵之處交與鄂爾泰調度廣西巡撫提督總兵官俱聽鄂爾泰節制○解程如絲任以葛斗南爲四川按察使由山東鹽運使遷○是月免浙江安吉仁和等州縣江西新喻等縣福建連江等縣上年水災額賦有差

三月戊子朔諭直省督撫等向來普雄烏蒙狃苗等兇悍性成又有漢姦爲之煽惑引誘是以肆行不法且其地在深山密箐之間最爲險阻內地干犯重罪之人往往逃匿其中一時難於捕緝上年冬岳鍾琪鄂爾泰奉命剿撫兇苗今據奏報普雄烏蒙狃苗皆革面革心輸誠嚮化則內地犯法之人向來逃竄苗地者此時必

不能隱藏又將轉徙他處爲苟活之計矣爲此密諭爾等可乘此機會設立賞格各密飭所屬文武官弁嚴行稽察勿使匪類得以漏網僅稽查不慎將來發覺之後定將從前經過之處不行查出之地方官弁及該管上司從重治罪○改陝西潼關衛爲潼關縣設知縣典史復設教諭訓導各一○庚寅諭內閣自古帝王致治誠民莫不以重農爲先務書陳無逸先知稼穡之艱難詩載豳風備敘田家之力作論語云百姓足君孰與不足孟子云民事不可緩也蓋國以民爲本民以食爲天農事者帝王所以承天養人久安長治之本也我國家撫綏寰宇 聖祖仁皇帝臨御六十餘年深仁厚澤休養生息戶口日增生齒益繁而直省之內地不加廣近年以來各處皆有收成其被災歉收者不過州縣數處耳而米價遂覺漸貴閭閻之間頗有不敷之慮望濟於鄰省良由地土之

所產如舊而民間之食指愈多所入不足以供所出是以米少而價昂此亦理勢之必然者也夫米穀爲養命之寶人既賴之以生則當加意愛惜而不可萌輕棄之心且資之者眾尤當隨時撙節而不可縱口腹之欲每人能省一勺在我不覺其少而積少成多便可多養數人若人人如此則所積豈不更多所養豈不更眾乎養生家以食少爲要訣固所以頤神養和亦所以節用惜福也况脾主於信習慣便成自然每見食少之人其精神氣體未嘗不壯此顯而可見者至於各省地土其不可以種植五穀之處則不妨種他物以取利其可種植五穀之處則當視之如寶勤加墾治樹藝菽粟安可舍而逐末棄膏腴之沃壤而變爲果木之場廢饔飧之恆產以倖圖贏餘之利乎至於煙菜一種於生人日用毫無裨益而種植必擇肥饒善地尤爲妨農之甚者也小民較量錙銖但

顧目前而不爲久遠之計故當圖利之時若令其舍多取寡棄重就輕必非其情之所願而地方官遠繩之以法則勢有所難行轉滋紛擾惟在良有司勤勤懇懇諄切勸諭俾小民豁然醒悟知稼穡爲身命之所關非此不能生活而其他皆不足恃則羣情踴躍不待督課而皆盡力於南畝矣朕聞江南江西湖廣粵東數省有一歲再熟之稻風土如此而仍至於乏食者是地土之力有餘而播植之功不足豈非小民習於怠惰而有司之化導者有未至耶或者曰米穀太多則價賤而難於糶賣昔人有穀賤傷農之說諺詔所謂熟荒者此則不必過慮假若小民勤於耕作收穫豐盈至於價賤而難於出糶朕必多發官價以糶買之使重農務本之良民獲利而有餘貲也朕生平愛惜米穀每食之時雖顆粒不肯拋棄以朕玉食萬方豈慮天庾之不給而所以如此撙節愛惜者實

出於天性自然之敬慎並不由於勉強且以米穀乃上天所賜以生養萬民者朕爲天下生民主惟有敬謹寶重仰翼天心默佑雨暘時若歲獲有秋俾小民家有蓋藏人歌樂土朕旣爲億萬生民計不敢輕忽天貺爾等紳衿百姓獨不自爲一身一家之計乎朝夕生養之需旣受上天之賜若果加意愛惜隨時撙節則天必頻加錫賚長享盈甯之福若恣情縱欲暴殄天物則必上干天怒不蒙眷養而水旱災祲之事皆所不免其理豈或爽哉又聞江西廣西地方竟有以米穀飼養豚豕者試思穀食之與肉食孰重孰輕孰緩孰急而乃以上天之所賜小民終歲勤苦之所獲者爲豢養物類之用豈不干天和而輕民命乎朕所以惓惓訓諭者惟期天下之人專務本業以杜浮靡愛惜物力以圖久遠共體朕敬迓天庥勤恤民隱之意則爾等家室必益至於豐饒爾等子孫必永膺

於福澤思之思之母忽朕言著將此曉諭內外官民人等並通行
遠鄉僻壤咸使聞之○諭朕以今年閏月節氣稍遲二月天寒故
將會試日期改三月但目今天氣尙覺寒冷若再改期又恐舉子
盤費無多難以久於旅食今照舊於初八日入場著曉諭各舉子
俱許攜帶手爐以溫筆硯皮衣及厚絛衣服俱許穿進但不得乘
機懷挾以滋弊端場內茶飯著供給官加意豫備朕另派大臣照
看料理令早晚給與薑湯並按名給發木炭以資其用○先是貴
州安籠總兵官蔡成貴奏廣西西隆州古障地方土目王尙義等
與貴州普安州捧鮓地方苗目阿九等歷年互爭歪染烏舍壩犁
魯濠等寨一案因土目自相讐殺俱係外結例無考成是以遲延
未結請敕下黔粵撫臣另委大員密斷並請嗣後審理兩省交界
土苗案件敕部議定期限於邊方實有裨益奉旨發與雲貴總督

鄂爾泰議奏至是鄂爾泰覆奏苗民劫奪不已地方官姑息因循釀成此習其故多由外結臣將分別流土考成使各有專責不致案件遲延不結之處具題在案至於黔粵之交原有大江爲界止因犬牙相錯以致彼此相爭今若劃江而理江以南屬之粵江以北屬之黔則界限井然防守稽察皆易爲力庶兩省之紛爭永絕矣得旨鄂爾泰既稱黔粵兩省當以大江分界今韓良輔李紱前往雲南與鄂爾泰面商苗地事宜著將此事一併會同定議其土苗爭訟案件例由外結者應如何定限之處亦著議奏○以廣甯弟廣祿襲封裕親王○壬辰王之麟綠事降調以錢以壇爲左副都御史由少詹事遷○吏部議准廣西巡撫韓良輔奏廣西泗城土府同知並無職掌請改爲思恩府泗城理苗同知專管泗城西隆西林等處苗民仇殺搶劫之事又太平府新改上龍下龍二土司所

屬鎮南大關係安南貢道且水路可通內地最爲緊要須設流官
彈壓請將太平通判移駐上下龍地方兼管憑祥土州等處經理
鎮南大關水陸隘口綏輯土民從之○癸巳諭八旗都統等兵丁
等喜喪之事俱已加恩賞給銀兩朕思大臣官員內有家貲饒裕
者亦有家計艱窘者其於喜事尙可若遇喪事倉卒之間必至窘
迫無措嗣後大臣官員若遇喪事有情願借銀者著戶部借給四
箇月俸祿至下季扣除若於未及扣除之前有緣事革職者除世
襲官員外仍令其賠補如病故者著卽賞給免令賠補其行取戶
部庫銀恐一時不能卽得先將旗下恩賞兵丁銀兩給與再行取
戶部庫銀墊補○戶部議覆雲貴總督鄂爾泰奏雲南黑鹽井正
額鹽每百斤請增新價銀四分二釐八毫又撥給不敷課款每鹽
百斤增新價銀二錢應如所請其迤東鹽價每斤再減二釐之處

無庸議得旨此事曾經李衛奏聞朕令鄂爾泰復行查奏今據鄂爾泰奏請於定額三分內每斤再減二釐以便商民鄂爾泰李衛均從地方起見其出產有舊無而可以新增者亦有舊有而應當裁減者若有彼此抵算之項准其據實奏聞則事皆覈實而督撫等亦易於辦理儻止令其增添而不許其裁減則殊非公平之道而隱瞞那移之弊且由此而生卽如貴州礦廠各處開閉不常所收賦稅多有隱此補彼者曾經毛文銓奏明改正雲南自近年以來督撫等清查鹽稅等項約計增銀甚多著鄂爾泰查明鹽斤內所增銀兩覈算明白抵補減價增新之數定議奏聞○乙未諭吏部漢司官屢經侍班朕得認識滿司官中有不認識者嗣後凡御門理事之日著滿司官四員漢司官四員一體輪流侍班引見若有條奏之事卽於侍班時密封具奏止許條陳一事不得以數事

並奏如此則司官之賢否優劣可知矣○諭士子讀書應試須專心講習方可望其成就入旗舉人生員內在護軍執事人行走者朕念其用度艱難恐致分心是以於雍正元年特加殊恩令其退回仍賞給錢糧養贍俾得專心讀書勉勵上進庶國家可收得人之益今已三年有餘其中或有年力衰邁及不肖之人徒領錢糧無志上進虛糜國帑者亦未可知若不加考課分別勤惰無以鼓勵人材著於會試後將八旗滿洲蒙古舉人生員漢軍舉人查明人數請題考試分別等第並驗其人品優劣具奏○丙申諭吏部盛京五部司官多係本處居住之人互相交結瞻徇情面欺蔽上司朕屢降諭旨不能悛改若不盡行調換難於整頓爾部將盛京本處之人見在郎中以下主事以上人員查明人數悉行調來以京員用其員缺著在京各部堂官派選辦事中等司官爾部帶領

引見補用所遺員缺卽將盛京撤回之員補授如此則盛京堂官易於辦理而盛京部院積習可以悛改矣○戊戌諭大學士九卿等朕辦理天下事務惟有物來順應初無成見成心蓋天下庶物殷繁人情詐僞變幻百出蒙蔽欺罔之處往往有之而一時聽從或不能不有錯誤而卽爲改易不存回護之見則誤者可以不誤而是非瞭然人亦知所做懼古之聖賢不曰無過而曰改過不吝朕常以此自勉也如蔡珽程如絲一案今日特宣諭爾等知之當日年羹堯奏請四川開設鼓鑄蔡珽執奏以爲四川不產鉛斤及訥親到彼則奏稱川省本有鉛斤而蔡珽勒令各屬誑稱無鉛以撓公事因將鉛斤鍊就呈進似此顯係蔡珽欺罔比時蔡珽又有威逼知府蔣興仁自盡之事年羹堯又奏其任內劣跡種種是以朕將蔡珽革職治罪及蔡珽到京而年羹堯諸事敗露朕召蔡珽

入見伊慝陳己之枉屈及平日抗拒年羹堯以致被訪之處並年羹堯貪酷殘暴各款朕觀其爲人聽其言論似乎尙屬和平不應有偏死屬員之事是以宥其罪而用之伊在朕前奏稱程如絲爲四川第一好官因得罪年羹堯是以誣參必欲致之死地今今年羹堯審訊必加以重刑則程如絲身命莫保等語朕以年羹堯素性殘虐蔡珽之言似乎確實因降旨令石文焯秉公審理及石文焯審奏年羹堯所參程如絲與販私鹽放槍殺人之處實係冤抑朕因蔡珽力言程如絲居官甚優是以用爲四川按察使以觀其後效然其中虛實眞僞朕究未釋然於中數年以來未嘗不時時留心訪察也前者檢閱汪景祺記載程如絲貪橫一條云程如絲重賄蔡珽調補夔州知府程如絲至夔凡商家所有之鹽盡以半價強買之私鹽船自夔至楚者官素不甚禁以活窮民程如絲悉

奪之私鹽船過夔程如絲遣人籍其鹽私商不服程如絲集吏人鄉勇獵戶汎兵幾千人往捕治之烏槍弓矢競發私商與捕人死者枕藉商人過客斃者無算蔡珽庇之不以上聞湖督楊宗仁受客商呈詞欲入告程如絲指稱是年大將軍意楊督竟寢其事年公聞之遂具題參劾奉旨革職鞫問蔡珽入覲力言程如絲爲天下第一清官上將大用之今此案令西安巡撫石文焯秉公確審石欲脫程罪且議復其官以合上意嗚呼浙撫黃叔琳以置土豪賀茂芳於死遂革職問罪乃知府殺人不計其數而反無過乎汪景祺記載之言如此伊乃年羹堯門下走狗其言何足爲據且謂石文焯出脫程如絲之罪乃迎合朕意此語更屬悖謬朕本無意石文焯何從迎合若云朕有所庇護則年羹堯乃朕當時藩邸舊人多年效力朕不庇護年羹堯而乃庇護素不識認之程如絲乎

卽如黃叔琳深受朕恩由太常寺卿歷升巡撫極蒙委任優眷朕不庇譴黃叔琳而乃庇護一海南無賴之光棍乎朕之賞罰悉本至公無一毫偏向之處而石文焯之開脫程如絲或別有因今觀蔡珽革率放縱徇私妄爲則偏向程如絲顛倒是非乃伊之實情而其所行背理之事較甚於此者更難悉數孔子曰君子不以人廢言汪景祺雖犯重罪身正典刑然其言未必字字皆虛今既有程如絲枉殺多人之語則外間爲此語者必不止於汪景祺一人此處甚有關於國家之政事必須究問明白得其實情始足以清吏治而肅官方剖是非而除壅蔽程如絲興販私鹽放槍殺人一案著侍郎黃炳前往四川會同岳鍾琪馬會伯及湖北巡撫憲德一述一明白審理從前被程如絲之害者多係湖廣之人著憲德一查一查出帶往四川質審再此案內有應行質審之人俱著黃炳等

行文調取質審目今岳鍾琪見在四川著行文令伊暫留川省辦理此事蔡珽候刑部案件質問後卽發往四川石文焯亦著前往四川於黃炳等會訊時令蔡珽石文焯二人在旁觀看○己亥上親耕藉田○庚子定鴻臚寺衙門仍屬禮部統轄○辛丑理藩院遵旨議覆朝正外藩四十八旗王台吉等嗣後應分爲三班每隔二年來朝一次從之○兵部議准福建總督高其倬奏閩省福興漳泉汀五府地狹人稠自平定臺灣以來生齒日增本地所產不敷食用惟開洋一途藉貿易之盈餘佐耕耘之不足貧富均有裨益從前暫議禁止或慮盜米出洋查外國皆產米之地不藉資於中國且洋盜多在沿海直洋而商船皆在橫洋道路並不相同又慮有逗漏消息之處見今外國之船許至中國廣東之船許至外國彼來此往歷年守法安靜又慮有私販船料之事外國船大

中國船小所有板片桅柁不足資彼處之用應請復開洋禁以惠商民並令出洋之船酌量帶米回閩實爲便益應令該督詳立規條嚴加防範從之○壬寅兵部議准貴州巡撫何世璽奏安順府鎮甯州屬康佐司土官薛世乾以罪革職伊子幼穉無知不能承襲請將康佐司地方改歸鎮甯州轄從之○癸卯署湖廣總督福敏奏臣奉命至楚任事之後卽查衙門從前陋規盡已革除惟武昌廠稅一項每年約計盈餘六七十或七八十不等又鹽商未裁禮銀四千兩前任督臣楊宗仁留此爲總督養廉之用臣非敢矯廉干譽緣受恩深重自奉過厚踴躍難安除一切用度外計餘銀四千兩今因饑民停賑恐青黃不接易致乏食卽以存銀買米散賑用廣 皇仁至兩省刑名錢穀事務殷繁必須幕賓相助辦理所需脩金等項臣俱於歲底將支用存貯細數另行奏聞諭此事

汝不必矯廉汝係暫時署理若令後任難乎爲繼亦非情理之平
督撫衙門養廉自當酌定數目朕豈有令汝等枵腹從事之理况
一切賞犒兵弁延納幕賓之需有斷不可省者山西陝西河南督
撫養廉朕皆許以三萬金因楚省何項可作督撫養廉朕未周知
難以批諭耳汝因署理之任正可一秉公恕斟酌允當之數隨便
附奏○甲辰刑部等衙門議覆川陝總督岳鍾琪奏趙智因被兄
趙宗痛毆情急回擊中趙宗要害殞命趙智因改爲擬暫監候得
旨弟毆兄死乃人倫風化所關法無可貸但因其中略有可原之
情故交與九卿令其再三酌議眾論僉同然後改爲監候以姑緩
其誅此不過數十案件之中間一從寬之事也昨李紱審擬楊四
毆死馬順一案竟以楊四護父強引鄭雄護母之例欲寬其罪夫
殺人者死律有明條大臣惟有按律定擬以待朕之酌量若似李

紱之枉法市恩徇私要譽則是朕之法外施仁偶然原情寬宥之處臣工皆強爲比照題請以濟其私而用法多不得其平內外臣工當以爲戒○命八旗每佐領添設副領一協同辦事○吏部右侍郎王沛恒以老病乞休加左都御史銜致仕○丙午俄羅斯察罕遣使臣薩瓦表賀登極進貢方物賞賚如例○丁未諭內閣向來督撫提鎮陳奏本章例有副本投遞通政司衙門又有揭帖知會關涉之各部院往往緊要之事未達朕前而先已傳播於眾口又如內外咨呈文書往來該衙門尤易疏忽以致匪類探聽多生弊端間有緝拏之犯聞風遠颺遂致漏網此皆不慎之故貽誤匪輕嗣後一切本章以及咨呈文書除平常通行事件外其有關涉緊要之案與緝拏人犯之處內外各衙門應密封投遞各該管官應謹慎辦理以防漏洩儻有疏忽將來事發之日究問根由必將

漏洩之人及該管官員從重治罪○諭吏部會試舉人著爾部揀選引見並問九卿將所知者舉出再舉人內有伊等同鄉素日推服之人亦著舉人公舉或數人公舉一人或十數人公舉一人俱將姓名註明務須有猷有爲有守之人方可推薦不可冒濫○戊申吏部議准雲貴總督鄂爾泰奏自湖廣改歸貴州之五開銅鼓二衛先經督臣高其倬奏請將五開衛改爲一縣兼管銅鼓衛地方令黎平府管轄奉旨允行臣細加訪察必須五開銅鼓分設二縣始於地方有益請添設知縣各一典史各一五開衛向無學校今請添設教諭訓導各一銅鼓衛向設教授一訓導一今請將教授改爲教諭其歲科二試取進文武童生各如舊額從之○己酉吏部議准雲貴總督鄂爾泰奏貴州銅仁府屬平頭司省溪司思南府屬沿河司朗溪司黎平府屬潭溪司八舟司龍里司歐陽司

新化司洪州司原設吏目各一稽察土司今請並加州同職銜重其職守以便就近彈壓從之○予故領侍衛內大臣馬武祭葬諡勤恪○庚戌調嵇曾筠爲吏部右侍郎仍留河東副總河任轉楊汝穀爲兵部左侍郎以胡煦爲兵部右侍郎由內閣學士遷○辛亥禮部奏會試舉人叨荷特恩合詞陳謝得旨朕視天下萬民皆爲一體況讀書鄉薦之人異日俱可作朕股肱耳目是以朕心待之實有一體聯屬之意愛養培護皆出於中心之自然並非欲邀天下士子之感頌也今舉子等以會試叨荷特恩合詞陳謝是尙不能深悉朕一體相關之意而存上下彼此之形跡矣朕待天下惟有一誠而崇儒重道之心尤爲篤切但所崇者皆眞儒所重者皆正道若徒尙虛文邀取名譽致貽世道人心之害朕不忍爲也爾等讀書之人實四民之所觀瞻風俗之所維繫果能誦法聖賢躬修實

踐宅心正直行己端方則通籍於朝必能爲國家宣猷樹績膺棟
梁之選卽退處鄉閭亦必能教孝勸忠爲眾人之坊表故士習旣
端而人心尙有不正風俗尙有不醇者無是理也爾等旣感朕恩
卽當仰體朕心恪遵朕訓爭自濯磨或出或處皆端人正士爲國
家所倚賴如此方爲實心報效不在感恩奏謝之儀文也○壬子
戶部議准署湖廣總督福敏等奏大江以南皆係財賦重地獨至
米穀則江浙等省每賴湖廣接濟苟倉庾所積充足有餘不但舉
省無憂乏食卽江浙等省或有歉收可以撥運平糶順流直下誠
甚便也今湖北湖南見存常平倉穀麥及截留漕米等項統計止
有五十餘萬石視他省積貯較少臣等公同籌畫須每年買穀數十
萬石分貯各倉以備不時之需查楚省尙有各衙門鹽規銀十
六萬兩經前督臣楊宗仁裁革迨楊宗仁故後各衙門仍復明裁

暗收臣蒙 皇上高厚隆恩萬無收受絲毫之理而觀感之下各衙門自不敢收受以此項銀兩買貯穀石自可備用再查江浙二省見開事例捐納貢監以裕積貯請令湖廣照例開捐著將各府知府收捐本色實貯在府倉廩以便盤查則湖廣積貯充裕不惟本省足食且東南各省便於撥運平糶賑恤黎民大有裨益從之○添設安徽江安糧道庫大使一○癸丑諭吏部兵部刑部盛京人員習氣澆薄營謀鑽刺朋比侵盜甚是無恥屢加教誡終不悛改皆緣犯法參革治罪之後仍在本地居住往往生事滋擾誘人爲非無所不至此等敗類若不卽令遷移望風俗之歸於醇厚終不可得嗣後盛京居住滿洲蒙古漢軍文武官員除因公誣誤獲罪者仍准本地方居住外其犯侵盜虧欠錢糧及姦貪訛詐之事降革者酌其所犯事由或令來京歸旗或著於各省滿洲駐防之

處安插如此則不肖之徒漸少而盛京澆薄之習可息爾三部嗣後凡遇盛京人犯罪案件俱照此定擬仍將從前盛京旗員所犯侵盜錢糧姦貪訛詐等案內廢員查明奏聞○實會試舉子下第路費銀各五兩○甲寅命江西丁銀攤入地畝徵收○兵部議准雲貴總督鄂爾泰奏經理狃苗事宜一長寨等狃苗不遵化誨阻建營房調兵進剿首惡悉經擒獲其未獲人犯有自行投首及脅從附和者請一槩從寬一苗民被剿四散已失耕種之期本年正賦請行豁免一歸寨苗民每人請月給糧三斗鹽六兩無力耕種者給以籽種以示撫恤其未歸寨者以一月爲限如逾限不同將該苗田土分賞兵丁一苗民地畝多恃強侵占以致互相仇殺應令各具契紙開明四至官給印信俾永遠承業一狃苗姓氏相同者多難於分別應令各照祖姓造報戶口清冊編立保甲其不知

本姓者代爲立姓以便稽察一苗民逞兇皆由兵器嗣後苗民出入止許佩數寸小刀所有一切軍器悉令繳出如有私造者卽行處決一營汛兵丁不得踐踏禾苗生事擾害如該汛文武官弁不加鈐束照溺職例治罪一長寨既有武職巡防仍須設一文員宣諭化導請以貴陽府同知移駐就近撫綏庶兵民咸得相安一打攘寨接連竹林井口兇苗出沒其中應撥長寨把總一員移駐則竹林等寨俱得控制一兇苗劫殺原非三五塘兵所能擒獲應令汛防各員一面申報督撫提鎮一面率兵擒拏所獲賊犯文武官會同審究無得袒庇徇私從之○予故大學士高其位祭葬諡文恪○丙辰工部議准河道總督齊疏勒奏黃河大溜頂衝之處請將斗岸削成斜坡令水隨坡溜再取密葉大柳懸於坡上以抵其溜之汕刷紓其力之猛烈久之大溜漸歸中泓而柳枝之上需挂

泥滓悉成沙灘易險爲平工不貴而費甚省並請凡河崖斗峻之處俱照此例行所需工費入搶修案內題銷從之

閏三月丁巳朔諭吏部朕日理萬幾惟欲周知庶務通達下情是以廣開言路令人條奏事件冀於政治有所裨益近見條陳人員內頗有能據實陳奏不避嫌怨切中情弊者朕思此等之人其言既可採錄則其善亦不可泯嗣後凡內外大小引見人員如有條奏交廷議允行者著該部記明檔冊其人日後或被堂官參劾或被督撫糾參該部議處覆本之時將該員某事曾經允行之處寫籤夾於本內進呈以便斟酌其事之輕重量與寬減則國家政治旣得條奏之益而其人亦深受敢言之效庶可共加勛勵也○諭八旗大臣等旗人犯罪革退官兵在京間住並無恆業倚靠親戚爲生以致良善之人被累伊等無事遊手好閒自必爲非作惡將

此等之人查出令於京城附近直隸地方耕種井田其作何安置之處爾等會議具奏尋議八旗另戶滿洲蒙古內因拖欠錢糧並非爲犯法革退之官兵無產業可依者請俱查明連妻子發往井田每戶給地三十畝每五戶給牛三隻其製辦農具籽種並半年口糧每戶給銀十五兩交與管理井田官員照伊人口多寡給與土房居住如有約束不嚴生事擾害等弊將該管官從重治罪得旨依議井田地方著添設驍騎校四員領催八名其俸祿錢糧升轉之處照京城驍騎校領催之例行如有已經升轉仍願在彼效力者卽帶所升品級在彼居住○戊午湖南巡撫布蘭泰奏開礦事宜諭開採一事目前不無小利人聚眾多爲害甚巨從來礦徒率皆五方匪類烏合於深山窮谷之中逐此末利今聚之甚易將來散之甚難也至於利之在公在私尙屬細事爾果欲效忠盡何

必諄諄以利爲言豈不聞有一利必有一害要當權其利與害之輕重大小而行之耳○添設盛京戶部刑部工部漢郎中各一員外郎各一主事各一○辛酉諸王大臣等參奏原任兵部尙書法海從前阿附允禩極力鑽營擅自回京行止狂妄應按律擬斬得旨法海原係革職發往軍前效力之人伊到軍前並無出力之處惟極力鑽營阿附允禩自謂有所依庇輒敢擅自回京又有種種不法之處本應按律治罪今從寬免死著發往插漢拖輝交與通智單騎書管轄聽其差委在水利處效力行走一切事宜毋許干預若果實心效力則已如仍不實心效力狂妄虛詐著通智單騎書卽行參奏○癸亥 聖祖榮妃薨逝 上降旨親往祭奠諸王大臣合詞陳奏請照從前裕親王母妃薨逝之例停止親往 上命莊親王允祿公馬爾賽一等公舅舅白啟往奠○吏部議覆川

陝總督岳鍾琪奏烏蒙土知府祿萬鍾奉旨革職提至川省質審烏蒙沿途土民俱各投順惟白女抵祿未申二人率所屬苗眾截路拒敵被官兵剿擊旋亦投誠歸附白女抵祿未申應行究提烏蒙人民久爲土酋殘虐應請改土歸流以甦邊氓積困查所參烏蒙各案見在雲南應行令該督將祿萬鍾等各犯解送雲南質審其烏蒙改土歸流之處候旨遵行得旨征剿烏蒙搗其巢穴係雲南官兵奮勇總督鄂爾泰調度之功然非川陝總督岳鍾琪將冕山涼山不法番夷悉行剿撫去其犄角之勢則雲南官兵亦不能成功如此之速白女抵祿未申敢於抗拒官兵甚屬可惡鄂爾泰屢次遣祿鼎坤招撫祿萬鍾而祿萬鍾不肯就撫及至勢窮力竭又至岳鍾琪軍前投到欲以巧脫重罪甚屬狡詐部議將祿萬鍾解往雲南質審甚是白女抵祿未申擒獲之時亦著解往雲南質

審餘依議又議授川陝總督岳鍾琪奏鎮雄土知府隴慶侯穉弱無知不能約束土目懇請改土歸流適准雲貴督臣鄂爾泰咨稱隴慶侯向與祿萬鍾勾通作惡今復唆使逃匿抗拒官兵法所難寬等語查鎮雄土府界連黔蜀二省應行令該督將隴慶侯解赴雲南質審其應否改設流官歸併何省管轄亦令會同雲貴總督鄂爾泰再奏得旨隴慶侯著解送雲南審明其鎮雄地方改土爲流歸併雲南就近管轄○乙丑吏部遵旨會同九卿揀選下第舉人引見 上命分發各直省以州縣委署試用諭守令乃親民之官關繫百姓之休戚故得其人則民生被澤而風俗日醇不得其人則百姓蒙殃而風俗日薄自古安民必先察吏此不易之經也朕御極以來夙夜孜孜欲使薄海之內無一夫不獲其所而此願一時難遂者則以縣令之不能盡得其人也果能得有猷有爲有

守之人布散各省分膺民社之寄彼一人之精神力量足以貫注
乎一邑凡督撫大吏耳目心思之所不能徧及者縣令皆能體察
經理之則民生安得不厚風俗安得不醇而朕心無一夫不獲之
願於是乎可遂矣向來各省縣令多循資按次照例選用之員故
其中庸碌無能者有之年力衰憊者有之少不更事者有之以致
苟且因循貪位竊祿諸凡開冗職掌廢弛此等之人尙不能顧一
身之考成豈能爲地方之憑藉乎今因會試後天下舉子齊集京
師朕思其中有才品兼優之士是以特加遴選畀以縣令之任朕
之所望於爾等者不僅在於辦理刑名徵收稅賦了簿書期會之
責而已必須實盡父母斯民之道視眾庶爲一體剛柔相濟教養
兼施化澆薄而爲醇良懲僉邪以安善類古稱愛民如子此語最
宜體會父母愛子之心未有不教之以正者縣令果視民如子豈

有優柔貽害姑息養奸行婦人之仁忘聖賢之義而可謂之恫瘝保赤者乎書經曰罔違道以干百姓之譽自古聖賢爲治皆尙實政最惡虛名若時存沽名市惠之心必至爲同流合污之鄉愿又何能爲整飭綱紀之良吏乎從來父子之間施者不以爲恩受者並忘其感守令之於民果能潛移默化使閭閻習爲固然而泯其感頌之迹斯不愧父母之稱而媲美古之循良矣紳士居鄉儻有違理肆行之處令有司約束勸導之者無非欲其同歸於善並非令地方官有意摧折之也爾等莅任後於紳士之品行端方者則當加意敬禮以樹四民之坊表其小有過愆者則勸戒之命其悛改其不可覺悟不可寬宥者則置之於法以儆其餘如此則賞罰公明輿情悅服而觀感興起比戶可封矣爾等身叨鄉薦皆以古之孝廉相比擬何以克副此孝廉二字且見經下第選期尙遠朕

破格遴選授以官職卽論感恩圖報之常情亦當人人自奮況朕心實仗爾等爲朕教養斯民移風易俗以成一道同風之盛爾等豈可薄待其身而爲陋習所漸染私欲所牽制乎爾等果能卓然自立不負選用朕自格外加恩儻拜命之初一時感激而莅官以後頓改初心則不但國典王章無可寬貸卽清夜靜思亦應無地自容矣勉之勉之○丙寅諭內閣凡州縣錢糧之虧空總不出侵欺那移二項當侵那之時官固主之而經手之經承自無不知也乃不行稟阻且從而慫恿之以便作奸分肥迨至本官監追而經承且優游於事外本官問重罪而經承僅得不行稟阻之處分故凡虧空累累多由於官吏之相成也朕以爲經承庫吏經管倉庫之人亦宜重其處分之例更定以勸懲之法凡州縣官到任先揀選殷實老成胥吏二人充錢糧總吏通詳報部凡徵收錢糧卽令

隨徵報解不得存留內署承辦五年該員無虧空者即將總吏咨部以九品雜職卽用本官少有虧空該總吏力行稟阻如不聽從許徑赴司院呈明免罪若該吏不行稟阻致本官以虧空糾參卽將經承一同監追減本官一等治罪如此則經承有所勸懲不敢順從本官擅動國帑亦杜絕虧空之一法也○諭據江西巡撫趙柱奏稱江西存倉穀石向係二錢一石折價存留各縣價銀二錢買穀一石實屬不敷等語朕思離任官員交代之際並無穀石存倉而以二錢一石之賤價交與接任之員接任之員力難賠墊以致穀石空虛弊端種種國帑民生均受其累此皆裴律度及厯任布政使等徇情市惠強令接任官員收受之故著將江西通省折價銀兩交與裴律度及厯任布政使作速照數買穀還倉不得借端絲毫派累小民再直隸各省倉穀若有前任官折價存庫者不

許新任官接任交代仍令前任官買穀交倉不許顆粒短少其該管督撫上司亦不得徇情寬縱儻敢故違定將本官及該管官分別從重治罪永著爲例○禮部議覆河南巡撫田文鏡奏捐納貢監歸併學臣與生員一體約束應如所請嗣後貢監犯事褫革行令督撫移咨學臣得旨該撫疏稱捐納貢監平日學臣毫無約束之權且與文武生員歸併學臣約束之例亦不畫一等語今部議貢監褫革者令地方官申報督撫移咨學臣一面褫革一面報部此議尙未周備捐納貢監既令學臣約束若必俟督撫移咨學臣則學臣仍無約束之權嗣後有應行褫革者令地方官申報督撫學臣其事屬督撫者准督撫移咨學臣其事屬學臣者准學臣移咨督撫如此始爲周備○丁卯諭大學士等從前奉天將軍噶爾弼奏盛京海洋應添設水師營分布三處自鳳凰城訖於海塘議

政大臣已經議准續據奉天府府尹尹泰奏稱自山海關迤南錦州復州蓋州地方海洋係進登州之海口不比大海旅順口關見有水師營今天津又設水師營此二營水師儘可輪班巡察若又添設水師營將來製造船隻修葺營房以及兵餉等項所需錢糧浩繁究於巡察無益等語經議政大臣議令噶爾弼尹泰會同畫一定議具奏今噶爾弼尹泰仍各執己見具題朕意以尹泰所奏爲是如添設水師營果於巡察有益卽多費錢糧亦應舉行今旣無益又何用添設從前朕降諭旨將盛京穀石由海用船運至天津盛京大臣奏稱盛京所有船隻難以海運穀石看來盛京所有船隻未必照數全備水手未必熟練著將朕旨曉諭議政王大臣此原係議政所議之事著再會議具奏尋議盛京添設水師營實屬無益應如尹泰所奏停止從之○戊辰以宜兆熊爲吏部尙書

仍署直隸總督○召福敏來京以邁柱爲湖廣總督

由署江西巡撫遷

○

兵部議覆浙江武舉會試應照文舉人例停止得旨士習澆漓不

干武途況浙省文有餘而武不足毫無不便之處武科著照舊會

試○己巳以趙城爲湖南布政使

由湖廣巡察御史遷

○癸酉諭內務府來

京考試舉子朕加意體恤屢諭崇文門監督不必查其行李致滋

勒索但恐巡役人等未必奉行盡善且恐日久弊生或有不肖之

徒假冒舉子名色夾帶貨物亦未可定爾等可於蘆溝橋查稅之

所設立店房務期寬展可容多人令舉子等卽於店內安放行李

其有無應行上稅之項爾等著人查看看畢給與照票令其入城

廣甯門不必重查如此則舉子行裝不至狼藉亦可免宵小假冒

之弊矣○雲貴總督鄂爾泰奏四川烏蒙土府祿萬鍾縱容土目

劫掠良民經陝西督臣岳鍾琪題參革職奉旨命臣會審臣前赴

東川有烏蒙祿鼎坤率二子投到臣遣其持檄往諭祿萬鍾等繳印就質乃祿萬鍾枝梧違抗至再至三而鎮雄土府隴慶侯向與祿萬鍾同惡相濟合謀拒命叛逆顯然臣咨商陝西督臣岳鍾琪調遣將士分路擒剿祿萬鍾見勢危急擁兵逃往鎮雄臣檄曲尋總兵劉起元率領官兵攻其倒江三灣諸險寨所向摧破兩酋計窮勢迫萬鍾等由筠連地方潛往川省遇川省守備胡璉解送成都隴慶侯等赴川省副將張玉行營繳印獻土今烏蒙鎮雄兩土府俱已平定見在量留官兵彈壓一面委員查勘界址並戶口錢糧實數以便改土歸流其兩府設官安營事宜及應歸何省管轄之處聽陝西督臣岳鍾琪詳議請旨得旨祿萬鍾隴慶侯等已有旨解雲南質審鄂爾泰辦理甚屬可嘉著議敘其在事人員查明分別議敘賞賚○復設河南河北守道一駐紮武陟統轄彰德衛

輝懷慶三府兼管河務以昨城縣並入延津縣裁知縣典史教諭
訓導各一○乙亥川陝總督岳鍾琪奏夔州府知府喬鐸等隱匿
變關稅銀得旨喬鐸著革職其捏結侵欺並程如絲扶同隱漏情
由俱交與黃炳岳鍾琪會同該撫嚴審追擬具奏各省稅課向來
隱匿者甚多雖奉旨稽查而徵收官員瞻顧從前隱匿之罪仍復
枝梧不將實數盡行報出及至敗露則於隱匿稅課之外又添欺
罔之重罪愈不可追朕心實爲不忍今特沛寬大之典准各處將
實在數目自行首出其從前多收之處免其究問朕旣如此開恩
倘再有隱匿日後發覺定治以重罪著該部通行曉諭知之○丁
丑恭建 聖祖仁皇帝聖德神功碑於 景陵遣官告祭碑文曰
皇天眷佑我國家顯謨盛烈世世相承 太祖 太宗肇基東
土締構鴻圖 世祖混一寰瀛克成駿業篤生我 皇考皇帝擅

神聖之姿立君師之極大德廣運健行不息至明如日至仁如天
集皇王之大成亘古今而首出書契以來罕有倫比以揚列聖
之耿光以裕我無疆大庥服予小子纘承基緒既奉冊寶恭上
尊諡惟山陵禮畢宜建穹碑欽惟我皇考臨御六十餘年厚德
崇功布濩宇宙盈溢簡牒巍巍乎蕩蕩乎不可殫述謹擬大槩鐫
勒貞珉用昭垂於億萬祀敘曰 聖祖合天弘運文武睿哲恭儉
寬裕孝敬誠信功德大成仁皇帝諱

世祖體天隆運定統

建極英睿欽文大德弘功至仁純孝章皇帝第三子也 母孝康

慈和莊懿恭惠溫穆崇天育聖章皇后在姪時 孝莊文皇后見

孝康章皇后衣裾若有龍繞知毓聖之祥逮降誕之辰異香盈

室經日不散五色光華與日並耀宮人內侍咸所瞻仰天表奇偉

耳大聲洪雙瞳日懸隆準岳聳膚理瑩白皎然玉質舉止嚴重性

度恢宏敦敏聰明出言中理辛丑正月嗣登大寶時甫八齡 孝

莊文皇后問所欲對曰惟願天下乂安兆人樂業共享太平之福

孝莊文皇后動容嘉歎知能荷神器爲生民主也自初讀書十

行俱下略不遺忘講幄旣開日與儒臣論難往復雖烈暑沍寒未

嘗暫輟焚膏繼晷常至中宵遜志覃思好古敏求勤篤甚於儒素

談經評史發揮道奧莫不觸類洞徹得其精要故知性知天察人

倫而明庶物雖一名一物皆研究精微而一以貫之敬 天尊

祖禮祀必親齊明盛服率履無怠至年踰六旬頗艱拜起冬至上

辛禘祭羣臣懇請遣官恭代猶必 親詣省視陳設行迎神之禮

退居齋幄默致精誠俟禮畢然後旋輅天性純孝事 孝莊文皇

后垂三十年致愛盡誠委曲周至從幸時乘馬不離左右遇道路

少仄卽下馬扶輦踰嶺則扶掖升降彌加恭謹康熙二十六年冬

孝莊文皇后聖體不豫 皇考親嘗湯藥席地而坐目不交睫衣不解帶者三十五晝夜逮疾大漸自撰祝詞步禱南郊請減己算以延慈壽伏地誠懇涕泗交頤至居廬時哀瘠過甚不盥沐者數十日釋服仍處偏殿衣布素恭送龍輅每日必步隨數里朝夕慟戚如初喪終身思慕每一言及聲淚俱發事 孝惠章皇后垂六十年備極孝養省方江南避暑塞外必奉鑾輿以行康熙四十九年 孝惠章皇后壽踰七旬 皇考亦年六旬矣正月元夕宮中張燈設宴躬親起舞稱萬壽觴中外稱爲天家盛事友愛裕親王等同問安 慈甯宮每序家人之禮親親之誼久而彌篤其疾也屢親視之其薨也親臨之宗室中用其才俊而禮其高年無爵位者亦有常廩自康熙六年始親政事未明求衣日昃忘食數御門延見公卿詳論得失綜理萬幾日有常程靡所稽滯嘗於巡幸

之次章奏未至秉燭以俟或於四鼓披覽達旦遂忘寢息孜孜圖治不自暇逸歷六十餘年終始惟一虛己求言以廣視聽片詞之善必蒙采錄或星象示異水旱爲沴卽命羣下直陳休咎所起無所隱諱又命督撫諸臣密奏地方利弊所宜興罷者雖在萬里之外周悉情狀視若目前審官班祿必惟其當內自六卿之屬外自縣令以上臨軒召見觀其可否然後命之其以清修苦節著聞者立行甄擢以勸有位介冑之士無小大必親試其能開霽天顏從容詢問寸長微績並加獎勵人皆感激自奮 聖性天授一經親謁歷久不忘故文武之選程材使器官得其人人稱其職 皇考智勇天錫妙算如神三逆未叛之前卽燭其終爲悖逆宜早定大計遣大臣趣召之吳三桂果反耿精忠繼之乃宣睿略簡禁兵守荊州安慶鎮江爲聲勢命諸大臣爲大將軍分道並進三桂自出

至衡州湖南皆陷王師扼之於岳州用戰艦據江湖斷賊餉道三桂憂怖死遂拔岳州盡收湖南地由陝西取漢興定四川明年定貴州又明年定雲南逆孽自焚餘黨悉平精忠兵出仙霞旁援溫臺大兵遏之衢州屢摧其鋒逐北入仙霞順流而下精忠自縛營前溫臺賊悉破散尙之信最後反王師北自韶州東自潮州蹙之之信束身乞降其間孫延齡陸梁於桂林王輔臣潰亂於甯羌戈鋌所指不久就俘常賊勢之熾大江以西五嶺以南悉爲賊踞烽火幾半海內 皇考默運神謨不動聲色八載之間再定寰寓廓清氛翳耿精忠之亂鄭經自廈門盜踞下游三府精忠敗大兵乘勢復三府經遁歸廈門越二年克廈門經遁歸臺灣以海舟守澎湖爲門戶 皇考決策命帥治艤臚以六月乘北風攻澎湖再戰破之臺灣震盪乞降遂以其地爲郡縣海氛起於明季自鄭成功

巢穴茲島傳子經及其孫歷三世出沒爲閩南患至是悉靖察哈爾部布爾尼者元之遺裔其先世納款獻傳國璽故荷特恩尙主封王父阿布奈漸爲狂恣 皇考不忍置諸法羈諸盛京俾布爾尼襲封召之不至遂以所部叛遣將帥禁旅討之兩月之內殲厥渠魁招撫其眾北藩以甯鄂羅斯夙慕德化奉職貢乃其邊人羅刹踞雅克薩城納我逋逃以擾索倫興師徂征拔其城縱其俘振旅而還會鄂羅斯之國王遣使上疏謝罪命大臣往定邊界東北數千里延及海邊胥隸版圖厄魯特者元之牧牲人也其頭目噶爾丹梟桀習戰鬪劫服諸番殘回子數百餘城復與喀爾喀構難潛劫其眾故喀爾喀七旗數十餘萬眾皆稱臣內附 皇考親巡塞外受其朝謁錫之名爵頒諭兩部落息兵甯人噶爾丹顧頑梗弗率以追喀爾喀爲名闖入邊界 皇考計安藩服躬申天討以

康熙三十五年春親統六師由中路直抵克爾倫料賊必逸而西別遣大將由西路進兵圖拉噶爾丹聞天兵至棄其輜重連夜西奔恰遇西師於昭莫多大破之噶爾丹收合餘眾竄伏窮荒其冬車駕再出至鄂爾多斯遣使招附明年春又出甯夏循賀蘭山哈密擒其子以獻其族類丹濟拉等潛輸誠款師次狼居胥山天兵四布噶爾丹勢孤援絕仰藥自盡丹濟拉攜其遺體及其子女人口來歸朔漠蕩定其兒子策妄阿喇布坦素與噶爾丹有隙乘其南發潛據其地誘致逋逃種類漸滋因圖青海諸部及西域諸番暗遣人攻拉藏殺之掠據藏地 皇考以 太宗文皇帝時班禪額爾得尼達賴喇嘛知東土有聖人遣使歸命追念厥誠不可以勿救於是分遣將帥率西甯諸路之兵自青海入四川雲南之兵自拉里入整旅前驅不遺一矢遂定藏地復達賴喇嘛之位安西

域之眾其他西番諸國無不欣喜感戴委盾恐後軫念東南水患
屢勤翠華躬視河淮每步長隄或駕小舟周回觀覽高下險易瞭
若指掌授策河臣罔不奏效開中河以避黃河八十里之險治下
河則疏人字芒稻河注之江溶蝦鬚諸溝注之海治清河則培高
堰塞六壩以蓄其勢開張福口裴家場以暢其流治黃河則浚雲
梯關以通海口築挑水壩開桃莊引河以導其北向築減水壩修
鹽河以洩其旁溢於是淮不東漫而北敵黃黃不南灌而東趨海
下河七州縣化浸爲沃農桑徧野漕艘商舶上下數千里安若衽
席其在畿輔之內則隄子牙而漳滏滹沱無泛濫開柳岔口而蘆
溝不橫決皆 皇考頻年巡省面授經畫用迄於成績勤求民瘼
凡所在暘雨之期封疆大吏隨時奏聞偶有旱潦無不周知賑恤
之恩不稽旬日籌畫詳盡溥徧優渥故雖有愆伏而民忘其災遠

至蒙古諸藩並廕 睿慮分遣使臣教以網罟耒耜之利俾之鮮
食艱食每聞積雪荒歉卽賜之牲畜米糧咸獲贍給康熙三十六
年朝鮮以大饑告截河南漕米由登州汎海發盛京倉儲合水陸
運至數萬石平糶賜資凋瘵盡起舉國忭慶蠲租之詔無歲不下
所在災傷見告卽與減除積年逋負輒免追徵積算無慮億萬計
人用底於殷阜四十八年特敕遞免天下地丁錢糧三歲而徧八
埏之內次第霑被寬仁之澤浹於黎烝隆冬停流遣之期盛夏解
囹圄之禁法司奏獄多所矜釋和氣薰陶萬方康泰至於三藩之
亂所全宥不可勝紀明降敕諭尙之信耿精忠罪大惡極法應及
族但念尙可喜耿仲明航海歸誠著有勞績其兄弟俱從寬免罪
屬下人有父兄子弟在賊中者一無所問又如噶爾丹子女赦弗
誅俾子有室女有家仍官其子自秦漢以來叛逆之條蔓及宗室

橫枉無辜 皇考宏曠蕩之恩遂除二千年誅戮慘酷之弊慎茲
祥刑復於三代興行教化申之以告誡 御製訓飭士子文刊於
學宮 聖諭十六條頒於州縣訓詞深厚丁寧周至士習民風於
焉丕變崇敬先師表章前賢東巡狩至於兗州親詣闕里致祭
孔子拜跪之儀有加於往代廣賢裔博士之封宋儒周邵二程張
朱皆稱子而不名升朱子祀於堂壽考作人開鄉會試者各二十
有二科髦俊蔚興相繼輩出增江浙入學名數廣直省鄉試解額
文思光被苗犛之秀隸籍鬻宮島上君長遣子弟就業辟雍窮山
越海靡然嚮風右文稽古命儒臣纂修周易折中圖象卦爻之蘊
親加論定又修書詩春秋傳說彙纂性理精義朱子大全經籍之
道煥然大明又親授詞臣考訂律厯合天津諸真度誠萬世不易
之法按北極之高測地理南北東西差得皇輿全圖其他所編輯

卷帙繁富充於內府聽政之暇喜操翰墨文成典誥詩爲雅頌書
跡神應天矩爲百代楷模閭五鈞之弓射大鐵之矢發則必中中
必洞貫文事武備並臻其極所謂天縱之聖又多能也致敬前代
禮踰常典自夏商以迄元明帝王膺麻服者咸入廟而享祀焉前
後南巡親祭明孝陵者三又欲封其後裔俾承世祀予小子祇奉
遺言錫之侯爵公卿大臣戎行將帥多服官至四五十年 皇考
眷待耆舊恩禮優渥凡朝會譙享龐眉皓首濟濟盈庭三代而下
誠爲盛典 皇考自幼齡奉 孝莊文皇后慈訓凡飲食起居視
聽言動皆有矩度盛德自然周旋中禮端展莅政天顏肅穆雖宮
庭間譙一言一笑不以假人太和元氣充於四體冬不鑊而自溫
夏不扇而手足未嘗濡汗正衣冠尊瞻視終日儼乎若思逮於耄
齡聖敬日躋敦尚儉素衣不辭澣濯食不取珍異宮掖人數至少

光祿寺一歲所費較之前代僅十之一服御器用歷久不易未嘗以故敝棄遺巡幸所至不煩民間一物宮室舟舫純用樸斲無丹青之飾秉德謙冲自平定三逆肅清朔漠凱旋告功及五旬六旬

萬壽節五十六年寶祿國家大慶諸王公文武臣僚太學生徒京兆耆老屢請恭上尊號雲集闕下備陳丹懇皇考頻下

諭旨讓而弗居於戲惟我皇考躬備聖德久道化成風教翔洽錫福烝人胥躋仁壽乃至鳥獸草木咸若守成之業恢於創造拓開疆宇廣袤各數萬里在昔未賓之國重譯踵至戴天覆地含生負氣之倫莫不尊親自有生民蓋莫盛於斯日者然且兢兢業業緝熙單心敬上天之明威察下民之視聽焦勞萬務未嘗以天位爲樂憂勤惕勵以迄於終身是所以接堯舜禹湯文武孔子之心傳優入聖域而仁覆天下也康熙六十一年十一月甲午崩聖

壽六十有九雍正元年九月丁丑葬 景陵謹拜稽首而作頌曰
維我皇清 上天眷命二儀凝祉 三朝篤慶 皇考紹烈建中
表正竇聰亶明乃神乃聖翼翼昭事仰格 高穹化將道贊祭以
誠通虔承 九廟孺慕 兩宮大孝備矣至德光融爰在冲年夙
成睿智致泰之基徵乎言志日就月將古訓是嗜理數兼該窮源
抽祕萬極在御八表君臨克勤於政無逸爲箴求衣忘食日昃宵
深慮周禹跡事塵堯心廣聽並觀樹旌建鼓無情不達有善必取
四門攸闢百司式敘文采珪璋武羅貔虎苞有三孽怙勢悖恩默
運神機載奠乾坤旆麾烽息駉指鯨奔提封式廓截海爲藩元裔
速辜不修厥職禁旅一臨兇渠伏殛羅刹擾邊邊帥討賊拔城縱
俘感恩懷德維彼雄梟構難比鄰比鄰內附稽顙稱臣敢抗明詔
怙惡不悛 天子三征掃蕩邊塵蠶茲遺孽構氛西徼自恃荒遐

狂跳縱暴堂堂天兵何幽不到底定三危恩同再造瑤池之水崑
崙之岡窮域絕漠越海踰洋書傳所記咸我版章敷天率土無不
來王睦念河淮頻乘四載旣安二瀆亦通百派一授成功萬世永
賴胥樂同憂仁膏徧沛周詩時邁虞典歲巡省方詢俗輦路生春
蠲租賜復歲有恩綸惠心溥渥益道平均陽雨偶愆恩澤已布朔
漠朝鮮同沾膏露象魏旣懸雞竿屢樹貫索其空桁楊可厝德惟
善政道在遺經紆御東魯親奠兩楹禮明樂備檜柏增榮光華復
旦天下文明覃心四府研精儒術典籍大興英髦踵出爰在璣衡
協時正日玉振金聲審音調律海涵地負大哉王言鸞鶴鳳翥煥
乎宸翰文經武緯異用同源道高能博藝備德尊厯代帝王祀典
彌厚備列几筵光延邁豆修敬前朝親臨鍾阜三恪垂封烝嘗有
後功勳耆舊恩禮優容龐眉皓首濟濟雍雍撝謙克讓川受谷沖

穆穆其敬安安其恭六幕啟宇八垓肇域維我 皇考憂勞靡極
三靈集祐五紀膺祿維我 皇考克勤不息貽我臣庶食德難忘
貽我子孫卜世無疆昌瑞之山峯峙川長功德穹碑天日同光○
己卯諭內閣三農仰資雨澤所重尤在春時今年三月間直隸地
方雨暘不一朕念切民依時時體訪昨閏三月十一日京師及近
畿之地俱得雨澤而蘇州僅有微雨不能霑足朕向來屢降諭旨
凡水旱災祲之故或因朝廷政事闕失或因該省大吏及該郡邑
有司有乖職守各致愆尤或因本地風俗偷薄人情澆漓此數者
皆足以上干天和致使陰陽違序古人言此最爲詳備而朕研究
天人感應之理確然知其不爽是以往復諄諄訓諭中外期於共
相儆勉修人事以格天心此念無一刻或忘也今春畿輔遠近雨
澤不均朕再四思維不得其故昨見保定府舉人蘇庭條奏請將

本年帶徵錢糧緩其徵收而又故爲迫切愁苦之詞欲以聳動朕聽卽此可知小民之心無時膺足當收成偶歉之際朕多方拯恤比歲緩徵而小民皆習視爲固然迨及歲已豐熟全不念租稅乃惟正之供輸將乃分內之事仍思遷延僥倖遂其私心轉覺納科完糧爲意外之事相對展轉志氣不舒遂致上干天和甘雨不能應時而降旣忘朝廷撫綏之深恩又忘上天錫福惠民之大德人情如此尙得謂之風醇俗厚而可邀上天之眷佑乎夫錢糧出於地畝凡應完國課者皆係有產業之家並非無力窮民可比豈有上年豐收之時全不籌及於今年國課之理假若民力果屬艱難該地方大吏有司自然體朕宵旰勤民之至意暫緩催科斷不忍過於迫急竭民力而違朕旨也朕因小民習染旣久私欲難除不識君民一體之情不知天人感召之理致干上蒼譴責垂慈示儆

朕心深用憫惻切加訓飭果能遵朕諭旨安分守法循理奉公則俯仰寬舒心志暢適古人云和氣致祥將見五風十雨大有頻書斷不憂水旱災祲之爲累若宵小無知以爲朕因催科降此諭旨則不但不知朕教養之深恩抑且昧天人感應之理矣著直隸總督督率有司體恤民隱教養兼施將朕此旨通行出示曉諭使遠鄉僻壤之民詳悉知之○庚辰諭內閣九卿翰詹科道等昔日

聖祖仁皇帝辦理天下事務六十餘年事事熟練故當奏事之時諸臣奏畢卽令退散不必久待自朕辦理以來於大小政務未能洞悉周知而其果否悉合機宜之處亦未能自信每欲與諸臣商榷討論以求其當是以諸臣奏事前來每多留一二時每令膳房頒賜飯食俾得飽餐以辦公事不至枵腹久待此朕體恤之至意也至於光祿寺每年動用錢糧仍遵 聖祖仁皇帝當年舊額無

所增益其因添桌飯而支用者朕則另發內帑以給之朕躬行節儉教導天下時以撙節愛養爲心而此等多費之處實以辦理公事之故第恐眾人不知或以每日多備桌飯花費錢糧輒生議論故特將此細事諭令知之○辛巳宗人府議奏輔國公阿布蘭擅將玉牒底本私交隆科多應革去公爵嚴行圈禁得旨阿布蘭著革去輔國公在伊家圈禁玉牒關繫緊要隆科多向阿布蘭將繕錄清本要去收藏在家是何意見著問隆科多將情由回奏○刑部遵旨議覆苗蠻黎獐改土歸流地方官兵役有勒索財物應分別數目治罪贓銀追給還主得旨此等應追入官銀兩卽限內全完亦不免其罪永著爲例○乙酉諭內閣聞會試舉人感朕特恩以今年爲朕五十萬壽特於京城寺廟設立經壇以申頌祝之意此舉甚爲虛妄朕臨御天下孜孜求治凡所行之事惟以

循理爲本誠以理之所在卽天意所在感孚默應捷於影響若朕所行悉合於理則問心無愧之處卽可以對越神明而輿情之頌祝與否皆可置之不問也朕儆戒乾惕之功無時或釋舉人乃平日讀書明理之人當效法古之聖賢豈可爲此世俗誕妄之舉且朕正念士子貧寒歸途艱於資斧是以賞給路費今乃費於無用之地尤不能體朕之心矣其所設經壇卽行禁止朕又聞各省督撫因朕今年五十萬壽欲購覓玩好之物以爲進獻者此舉尤爲不可夫地方大吏偶有進獻方物土產者不過借此以達其瞻仰之意而朕之酌量收納又復隨便分賜廷臣者亦所以聯君臣上下之情若今年亦止照每年之例備辦尙准其奏達朕前儻別有玩賞之物槩不寓目朕仰賴 皇考福庇在藩邸數十年所蓄器玩頗有及卽位後見宮中傳留古玩器皿皆質樸之物實無奇異

爲人所罕見者言之於人亦令人難信視朕藩邸所藏尙屬不逮
朕深用抱愧於懷當日二阿哥在東宮時廣蓄奇巧珍貴之物數
倍於 皇考宮中之所有朕仰思 皇考恭儉至德實可垂法萬

世欽服之誠切於五內益覺二阿哥之所爲實屬無益當爲鑒戒
也朕旣深知二阿哥之非若朕此時復留心玩好廣收進獻則將
來子孫之賢而有識者豈不以此爲朕躬之累乎朕意欲俟暇時
將宮中所有之物或係 皇考流傳或朕藩邸舊蓄一一分晰標
記以明 皇考之儉德俾世世子孫共知之又安肯多收玩好以
滋朕心之愧乎朕徵清吏治令督撫諸臣共勵廉隅卽量予公費
不過供其日用之需安有餘貲搜求玩器儻轉索之於屬員則又
開下吏逢迎奔競之漸尙望其秉公督率整飭官方乎朕心惟以
民安物阜爲美薦賢舉能爲貴儻督撫等秉公察吏實心爲國行

一利民之政勝於獻希世之珍也薦一可用之才勝於貢連城之寶也當年 皇考五十萬壽時朕再三懇請慶賀不蒙 俞允若以朕所強求而不能仰得 皇考歡心者今朕五十壽誕躬自舉行於心實有未安至於設立經壇建立碑亭等事在 皇考當日甚鄙而厭之因見諸臣籲懇之切隨便聽其舉行乃朕所深悉者而其中羣下隱情在 皇考實不能深知朕居子臣之位四十年於臣庶情形皆所親見是以不肯復爲內外諸臣其共體朕心祇遵朕諭殫竭誠意屏絕虛文勉之勉之○諭各省建立忠義節孝祠宇及賞給老民老婦布絹米石皆係朕之特恩凡地方有司自應實心奉行以彰朝廷曠典昨據安徽巡撫參奏太湖縣知縣冒開老民數至二千餘名之多卽此則各省有司之奉行不能無弊可知矣建立忠義節孝祠宇表揚德行在地方有司獎善慕義之

公心卽捐輸已貲亦當勇往今朕動用國帑爲之建立而承辦各官尙忍於冒銷錢糧草率從事以致易於傾圯有此情理乎著行文各省督撫詳加察勘有無冒銷果是堅固之處不得容其蒙混並令各地方官將所建祠宇造入盤查冊內前後交代儻工程不堅未久卽至坍塌者仍著落原辦之人賠補至於永遠照看修葺則係地方官分內之事若能隨時整理所費不過數金多亦不出數十金甚易爲力嗣後責成於地方官則彼視爲己事時時留心大於祠廟有益儻准其動用正項錢糧修理不肖有司必致借端開銷而奸胥猾吏又從中侵漁入己有名無實屋宇必致頽壞負朕彰善闡惡之至意矣太湖縣冒開老婦名數業已被參各省州縣必有冒濫開銷及胥吏蒙混侵蝕等弊著各省督撫一併確查如該地方官將浮冒之處自行出首免其治罪儻仍隱匿不報或

經旁人告發或被督撫科道等題參定行嚴加治罪○丙戌諭宗人府宏昇辦理旗務並不以事爲事多方教訓不知悛改著不必辦理旗務嚴加議處具奏尋議宏昇身受隆恩封爲世子委以重任並不實心效力應革去世子得旨宏昇著革去世子交與伊父允祺在家嚴加訓誨若不能約束仍致妄行生事定行一併懲治○兵部議准雲貴總督鄂爾泰奏湖廣五開銅鼓平溪清浪四衛改歸黔省管轄應增設官兵防守五開銅鼓請將黎平協官兵撥防查黎平協原設副將一守備一千總二把總四兵六百二十名今加五開銅鼓二衛地方遼闊恐難兼顧應添設守備一兵三百八十名合原設之官兵分爲左右兩營駐防平溪清浪乃水陸要衝應撥鎮遠協分防思州之遊擊一駐紮撥把總一兵一百五十名分守平溪把總一兵五十名分守清浪至思州係府治亦不可

無官防守應於鎮遠協內撥千總一兵五十名駐防其自湖廣歸併黔省之天柱營所有參將守備千總等應令黎平協副將兼轄再平溪清浪二衛請照五開銅鼓之例改爲二縣設知縣典史教諭訓導各一從之尋定五開新改縣曰開泰銅鼓新改縣曰錦屏平溪新改縣曰玉屏清浪新改縣曰清溪○是月免廣東東莞等縣上年水災額賦有差

夏四月丁亥朔諭內閣大學士富甯安在 聖祖仁皇帝時宣力

多年清操素著領兵邊塞十有餘載備極勤勞自朕卽位以來見其辦理軍務恪慎周詳及簡任大學士公忠誠實靜鎮和平甚屬可嘉著加太子太傅以示優眷○以班第爲理藩院額外侍郎願

魯爲內閣學士

由內閣侍讀學士遷

○戊子議政王大臣等議奏吐魯番回

目白斤伯克奏請照前每年差人請安進貢應不准行得旨所議

甚是但止令員外郎升柱遣其歸去而不言其故所見甚小辦理天下事務莫貴於誠理應以誠實曉諭之曰前策妄阿喇布坦無故來侵哈密又騷擾西藏 聖祖皇考將沿邊官兵兩路分發爾吐魯番當進兵大路若不先取爾吐魯番斷乎不可故取吐魯番留兵防守以保護爾等後策妄阿喇布坦悔過輸誠遣使根頓博洛胡爾哈特來請罪朕仰體 聖祖皇考之心卽將大兵撤回撤兵之後策妄阿喇布坦或以爾等歸順天朝尋隙生事將爾等騷擾亦未可定朕軫念爾等曾降諭旨有情願隨大兵同來者聽故拖克拖麻穆忒移來內地安居樂業爾等想已聞知今爾等奏稱請仍照前差人來京凡外藩部落人等請安進貢從無禁止之例所以不令爾等來京者誠恐策妄阿喇布坦騷擾爾等耳爾等如云策妄阿喇布坦卽便發兵亦不畏懼可以保吐魯番萬無一失

朕亦不禁止爾等但恐將來策妄阿喇布坦騷擾爾吐魯番之時
爾等雖欲奏報內地相隔甚遠大兵一時不及救援也著行文與
升柱等曉諭吐魯番回目知之○己丑吏部遵旨將會試下第舉
人挑選各省教職引見諭教官有董率士子之責果能實心訓導
使諸生讀書循理無佻達器陵之習則齊民有所觀法風俗可望
醇厚所關非淺鮮也乃向來教官因循偷惰全不以教訓爲事朕
屢頒諭旨而積習如故因於爾等下第舉人中擇文理明通者引
見命往諭爾等科分名次尙非應選之人朕加恩特用務須勉力
供職加意訓誨六年之內如果著有成效督撫題薦朕格外加恩
如有負職守經督撫題參朕不姑容也○查弼納緣事降調仍命
署兵部尙書以福敏爲吏部尙書查郎阿爲左都御史仍辦理吏
部事

由吏部左

侍郎遷

○以正黃旗漢軍都統協理兵部侍郎事黃國材

署兵部尙書○辛卯 上御太和殿賜彭啟豐等二百二十六人進士及第出身有差○壬辰申禁黃銅器皿○雲貴總督鄂爾泰奏鎮沅府猓賊於七月十七日夜縱火肆掠威遠同知署鎮沅府知府事劉洪度被害隨調元江協副將張應宗等領兵前往陸續獲賊首刁如珍等五十餘人賊黨百餘招回夷民三千餘戶得旨猓賊聚眾妄行大干法紀在事官弁奮往效力殊屬可嘉著交部議敘其被傷官兵著交鄂爾泰查明分別優卹○癸巳諭內閣從來爲政在乎得人書曰野無遺賢萬邦咸甯蓋賢才登進仕位者多則分猷效職庶績自能就理而民生無不被其澤也朕卽位以來加意旁求凡所以延訪擢用之道無不備至如見任官候補候選科目諸人每特令薦舉遴選引見廣開錄用之途冀收羣策之力又念各省學校原以養育人材命學臣保舉賢能升聞於朝以

備任使乃直省學臣所舉人數不多又或草率塞責不能副得人之實夫十室之邑必有忠信古者取人之法惟鄉舉里選合於三代之制今直省府州縣學貢生生員多者數百人少亦不下百餘人其中豈無行誼醇篤好修自愛明達之士乎著州縣官會同該學教官將貢生生員內居家孝友行己端方可辦事而文亦可觀者秉公確查一學各舉一人於今年冬底申報該上司奏聞請旨或實無可舉者出具印結該督撫查實奏聞朕因廣攬人材舉此曠典所以黜浮華而資實用州縣敎職爲一方師長選賢薦能乃其專責儻敢虛應故事濫舉非人照溺職例革職或徇情受賄則當重治其罪八旗之滿洲蒙古漢軍亦照此例將人品端方通曉漢文者著該佐領各舉一人如不得其人亦具印結令該都統彙齊奏聞請旨庶使潛修篤行之士得以表見而國家亦收得人

之效矣○以兵部尙書何天培署江南江甯將軍○實授眾佛保理藩院左侍郎班第理藩院右侍郎○乙未廣西巡撫韓良輔奏移駐官弁事宜一查柳州設有同知通判各一經歷司獄各一今將柳屬之賓州改爲直隸屬以四縣則柳州同知似屬允員應裁至慶遠一府所轄一州四縣並南丹那地東蘭忻城等土州縣幅員遼闊苗獞雜處乃設知府而無同知通判請以所裁之柳州同知改設慶遠府同知一轉移間大有裨益一查上林之三鎮在縣城東北一百四十餘里接界忻城安定二土司故明時號其地爲東西二撫民設立思吉周安古蓬三鎮給官田養贍土兵厯經三百餘年忘其舊制奪田爭立積案纍纍擬將思吉鎮之兵田查出分給土兵歸於三里營守備管轄輪撥經制千總一員以統制之並移佐貳一員協同守備暫駐思吉播以恩威俟思吉馴服之後

再及於周安古蓬俾一一革心向化一查上林縣處於安定古零忻城諸土司中所屬之東西二撫民及思吉等三鎮卽故明所平八寨箐深山密嶺悍難泊向屬柳州府轄雍正三年前撫臣李紱請改隸賓州之後一切要務徑達該州賓州又無官兵足資彈壓實於機宜未協若將上林改屬思恩府將三里營改屬思恩協不獨文武相去咫尺便於調度且將來經營三鎮其地旣屬思恩則同知可以暫駐三里營與備兵協同辦理而思恩府協之聲威足以制服猥獍其古零安定等土司逐漸撫綏不難矣得旨著孔毓珣會同東西督撫提督議奏尋議柳州府應裁同知一處遠府應添同知一俱准其改設其思吉鎮應移佐貳一請卽將上林縣之三畔鎮巡檢移駐至新經改屬賓州之上林縣及三里營請應照舊制屬柳州府轄毋庸議改餘均如所請行從之○丁酉刑部議

奏奉天府府尹蔡珽應許戴鐸求託轉奏等案應擬斬立決妻子
入辛者庫財產入官得旨蔡珽著革職將此本暫收內閣俟伊四
川案件審結到時一併進呈○戊戌宗人府議奏允祚於禁所藏
埋魘魅歷供不諱又供出與阿其那共爲不法應立正典刑得旨
允祚著免其正法仍舊禁錮○己亥以布蘭泰爲戶部右侍郎仍
署湖南巡撫○實授塞楞額山東巡撫○禮部議覆鑲黃旗滿洲
都統鄂善奏鄂善之高祖尙善自沾河歸誠蒙太祖高皇帝殊
恩將親妹公主下嫁因在盛京薨逝未得冊封懇請追給封典應
如所請其應封固倫公主和碩公主之處恭候欽定得旨著封
爲和碩公主○庚子以蔡世遠爲內閣學士由少詹事遷○辛丑諭內
閣朕今年五十已有諭旨不行慶賀禮昨楊名時南天祥摺奏俱
稱今年進京慶祝萬壽朕思聖祖仁皇帝久道化成聖德神功

際天蟠地當年五十 聖壽之時尙未允行慶賀之禮今朕臨御以來雖時時有勵精圖治乂安海宇之心而實在善政善教可以造福於社稷蒼生者何事堪以自信正當君臣交相儆勉期於有成又安可爲此粉飾之事以滋煩擾乎朕之待下惟有一誠諸臣果矢誠懇之念於隱微寤寐之中尊君親上如詩書所載元后父母之誼豈不勝於拜舞彤墀效稱觴祝嘏之儀節乎外任諸臣俱不必具本奏請來京止照常年之例行若有因地方事務應來京陛見者朕自另降諭旨其各省耆民等若有欲來京慶祝者著地方官切止之再各省地方若有指慶萬壽建立經壇或聚集梨園誼譁糜費者此皆生事不安本分之徒誘惑愚人希圖財利尤宜嚴禁儻有司不行禁止經朕訪問定照欺罔之律治罪○添設宗人府宗室御史二屬都察院轄○壬寅調阿克敦爲吏部左侍郎

仍署廣東巡撫轉圖理琛爲兵部左侍郎調永壽爲兵部右侍郎

莽鵠立爲禮部右侍郎以塞爾臣署刑部右侍郎公○以岳爾岱

爲吏部右侍郎由副都統遷○吳爾泰緣事降調以永福爲盛京兵部

侍郎由左副都御史遷○癸卯佛喜緣事降調以管承澤爲四川布政使

由署通州副將遷○乙巳諭宗人府溱親王子弘曙愚昧怠惰並無勉勵

成人之意著將其長子革去伊弟弘曜人老成著封爲長子○議

政大臣等遵旨議准雲貴總督鄂爾泰奏中甸一區爲雲南西面

藩籬延袤二千餘里應設弁兵以資控制但中甸雖地大民衆天

氣寒冷不能種植維西一帶天氣和暢又接鶴麗鎮釗川協之汛

防外通西藏實緊要之區應於維西建立大營設參將一千總一

把總一兵四百名駐紮中甸地方應設守備一把總一兵丁二百

名駐紮中甸之格咱地方應設把總一兵五十名奔雜拉渡口應

設把總一兵五十名祁宗喇普二處應各設兵五十名阿墩子應設千總一兵一百五十名瀾滄江應設把總一兵五十名其守備千總兵丁統屬於維西營之參將仍聽鶴麗鎮統轄則聲勢聯絡呼應得靈其設兵一千名應於鶴麗鎮抽兵四百名釧川協抽兵二百名援剿左右兩協抽兵四百名撥歸維西營餉銀移彼就此已敷給放其所設營弁應裁援剿右協守備一兩協標千總各一把總各二撥補維西營止須設參將一一轉移閒內外營制俱合機宜而兵餉不致增添得旨維西一區乃通藏之路甚屬緊要今令兵丁移駐邊遠地方搬移家屬等項不可節省錢糧必須豐裕足用著降旨與總督鄂爾泰辦理餘依議○丁未署湖廣總督福敏奏謬沖花苗蠢動經臣會商黔省協力擒捕今黔省委撥遊守二員帶兵三百五十名臣委遊擊吳文都司劉策名帶兵三百名

會齊進剿黔兵堵截後路楚兵從前路直抵賊寨兇苗四散逃竄
深箐官兵深入搜捕務盡根株俟事竣日查明疆界作何安設塘
汛巡防善後之策臣與黔省督撫提臣會同酌議奏聞諭閱奏捕
苗情形深愜朕懷此番籌畫甚合機宜○戊申移雲南鶴慶府通
判駐維西添設釧川州判一駐中甸○己酉諭內閣治天下之道
在於用人今日刑部堂官塞爾圖等保舉筆帖式一人升補主事
朕問其在部辦事幾年則對曰三月又問所以保舉之由則曰因
伊坐臺十二年是以舉之朕令內外各衙門遴選人員者原期官
得其人人稱其職使吏治民生均收實效也況刑部爲民命所關
朕尤加意慎重惟恐用人不當使刑罰偶失其平干天和而枉國
法此意乃舉朝所共知者塞爾圖等以朝廷量能授職之典視爲
用情市恩之地此不過身受者一人感激而已欲有益於國家之

事生眾人鼓勵之心豈可得乎朕治天下用賞用罰悉秉至公夫賞所當賞則在朕並非加恩而受之者不必私感罰所當罰則在朕並非用威而受之者亦不當懷怨凡受恩而生感者卽受罰而生怨者也施恩而喜人之感激者卽受罰而懼人之怨望者也然則喜人感激日日施恩而懼人怨望不幾置法度於不用乎塞爾圖等身爲大臣乃庶官之表率今存卑鄙狹小之見旣欲市賣私恩則必回避嫌怨似此私心自用卽作威作福之所由也此風斷不可長是以特行宣諭令內外臣工以爲戒○諭領侍衛內大臣六員實授內大臣亦著定爲六員朕特旨額外補授者可准爲額外之員○癸丑諭內閣朕以移風易俗爲心凡習俗相沿不能振拔者咸與以自新之路如山西之樂戶浙江之情民皆除其賤籍使爲良民所以勵廉恥而廣風化也近聞江南徽州府則有伴僮

甯國府則有世僕本地呼爲細民幾與樂戶情民相同又其甚者如二姓丁戶村莊相等而此姓乃係彼姓伴僮世僕凡彼姓有婚喪之事此姓卽往服役稍有不合加以箠楚及訊其僕役起自何時則皆茫然無考非有上下之分不過相沿惡習耳此朕得諸傳聞者若果有之應予開豁爲良俾得奮興向上免至污賤終身累及後裔著該督查明定議具奏尋禮部議淮安慶巡撫魏廷珍遵旨議奏江南徽甯等處向有伴僮世僕名色請嗣後紳衿之家典買奴僕有文契可考未經贖身者本身及其子孫俱聽從伊主役使卽以贖身本身及在主家所生子孫仍應存主僕名分其不在主家所生者仍照旗人開戶之例豁免爲良至年代久遠文契無存不受主家豢養者槩不得以世僕名之永行嚴禁從之

五月己未諭內閣前織造等衙門貢獻物件所進御用繡綾黃龍

袍增至九件之多又鐙幃之上有加以綵繡爲飾者朕心深爲不
悅卽降旨誠諭近因端陽令節外間所進香囊宮扇中有裝飾華
麗雕刻精工者此皆開風俗奢侈之端朕所深惡而不取也向來
外省諸臣凡有進獻方物朕每頒賜諸王內外大臣如黃龍繡段
之類旣不可以頒賜不過收貯於宮中耳其餘華燦之物在朕用
之心中尙覺不安若賜諸王大臣在伊等亦覺非分豈非費於無
益之地乎況朕素性實不喜華靡一切器具惟以雅潔適用爲貴
此朕撙節愛惜之心本出自然並非勉強數十年如一日者凡外
臣進獻惟應量加工價少異於市肆之物卽可見恭敬之忱何必
過於工巧人情喜新好異無所底止見美麗式樣初則競相慕倣
後必出奇鬪勝此雕文纂組古人所以斥爲奇袤豈可導使爲之
而不防其漸乎蓋治天下之道莫要於厚風俗而厚風俗之道必

當崇儉而去奢若諸臣以奢爲尙又何以訓民儉乎朕觀四民之業士之外農爲最貴凡士工商賈皆賴食於農以故農爲天下之本務而工賈皆其末也今若於器用服玩爭尙華巧必將多用工匠市肆中多一工作之人則田畝中少一耕稼之人且愚民見工匠之利多於力田必羣趨而爲工羣趨爲工則物之製造者必多物多則售賣不易必至壅滯而價賤是逐末之人多不但有害於農而並有害於工也小民舍輕利而趨重利故逐末易而務本難遽然繩之以法必非其情之所願而勢有所難行惟在平日留心勸導使民知本業之爲貴崇尚樸實不爲華巧如此日積月累遂成風俗雖不必使爲工者盡歸於農然可免爲農者相率而趨於工矣至於士人所業在乎讀書明理以爲世用故居四民之首然父兄之教子弟亦當觀其才質如何若果穎悟恂謹可望有成則

當使之就學而爲士若愚濁中下之資讀書難通卽當早令改業使盡力於南畝誠恐讀書不成而又粗識數字曠廢閒遊必致非分妄爲越禮犯法是浮慕讀書之名而不得其道其傷農而害本者爲尤甚也朕深揆人情物理之源知奢儉一端關係民生風俗者至大故欲中外臣民黜奢賤末專力於本人人自厚其生自正其德則天下共享太平之樂矣朕自身體力行爲天下先諸王內外大臣文武官弁與鄉紳富戶當深體朕心欽遵朕諭期共勉之○庚申諭內閣朕覽治河方略見原任河道總督靳輔昔年修理河工勞績茂著欲加恩澤以獎勵庸據該部查奏靳輔於康熙四十六年己蒙 聖祖仁皇帝加贈宮保給與世職今著追贈工部尙書銜予祭一次以示朕篤念前勞至意○辛酉諭內閣今科選拔庶常應如何簡選考試務得人材以濟實用爾等會議具奏尋

議進士選拔庶常原屬儲才大典必得學問素優才品兼著之士方可選列清華查雍正元年癸卯科殿試後集諸進士於保和殿御試並令九卿各舉所知雍正二年甲辰科照前舉行今科進士亦應詳加考試仍令內閣九卿確行保舉其考試擬用論詔奏議詩四題或作一二篇或諸體全構聽其各展所長屆期欽點大臣閱卷進呈其進士內有彼此熟悉素爲眾所推服者亦令公同舉行伏候 皇上親加選定從之○壬戌內閣衙門議奏查嗣庭蒙恩擢用歷至禮部侍郎陰懷二心忍行橫議臣等謹將查嗣庭所著日記悖逆不道大罪並負絲請託關節私書逐款究審嗣庭亦俯首甘誅無能置喙除各輕罪不議外應照大逆律凌遲處死今已在監病故應戮屍梟示查嗣庭之兄查慎行查嗣璫子查灃姪查克念查基應斬立決查嗣庭之子查克上在監病故次子查

長椿查大梁查克纘姪查開查學俱年十五以下應給功臣之家
爲奴所有財產查明入官得旨查嗣庭著戮屍梟示伊子查湮改
爲應斬監候查慎行年已老邁且家居日久南北相隔路遠查嗣
庭所爲惡亂之事伊實無由得知著將查慎行父子俱從寬免釋
放同籍查嗣庭之胞兄查嗣璫胞姪查基俱免死流三千里案內
擬給功臣之家爲奴各犯亦著流三千里其應行拏解之犯該撫
查明一併發遣查嗣庭名下應追家產著變價留於浙江以充海
塘工程之用○癸亥阿布蘭緣罪革爵封其姪法爾善爲輔國公

○甲子宗人府奏滿都護隱匿

聖祖仁皇帝硃批諭旨應革去

公爵得旨滿都護係朕親叔恭親王之子是以朕卽位時任以要
職伊自委用之後總不實心爲國家出力惟戀戀於阿其那蘇努
保泰等黨與甘爲犬馬不孝不忠伊弟海山人甚狂悖海山之子

倫木布 聖祖仁皇帝望其成人令隨乾清門御前侍衛處行走
及 皇考升遐伊竟無滴淚朕見其如此忘恩實爲痛恨故令於
伊父海山處拘禁滿都護之弟對青額庸劣無恥在侍衛班中飲
酒沈醉竟在中和殿階上洩溺滿都護隱匿不參及朕聞知止於
革退亦未將伊究治也海山任貝勒時滿都護任伊陵辱隱忍不
露而暗將海山謀陷中傷糾伊黨與極力排擠其姦詐處朕知之
最悉雖時加訓誨伊並不感恩改悔而於其黨與則甘心出其胯
下伊大罪甚多不勝枚舉因伊尙無子嗣彼兄弟子姪中又無可
以襲封之人是以朕俱寬免今未交 硃批之事以伊身所犯之
罪較論之此猶其小者耳若將滿都護革去公爵則恭親王子孫
承襲無人滿都護雖不念其父朕豈不念朕叔父乎著從寬免革
公爵俟伊改悔○乙丑刑部議覆署江西巡撫邁柱奏永新縣民

朱倫三同姪朱三傑致死伊弟朱甯三一案朱倫三應擬流徙朱三傑應擬徒得旨從來兇悍之人偷竊姦宄怙惡不悛以致伯叔兄弟重受其累本人所犯之罪在國法未至於死而其尊長族人翦除兇惡訓誡子弟治以家法至於身死亦是懲惡防患之道情非得已不當案律擬以抵償如朱倫三因伊弟朱甯三屢次犯竊累伊鬻男變產代賠贖銀又復偷牛被獲故將朱甯三致死朱三傑並未與謀著將朱倫三朱三傑流徙等罪俱從寬免嗣後凡遇兇惡不法之人經官懲治怙惡不悛爲合族所共惡者准族人鳴之於官或將伊流徙遠方以除宗族之害或以家法處治至於身死免其抵罪著九卿詳悉定議具奏尋議兇悍之人伯叔兄弟治以家法因而致死若必案律擬抵則不法子弟終不知所儆懼嗣後許族人呈明地方官照所犯罪科斷若已經官懲治仍不悛改

該地方官查明過犯實蹟流三千里儻事起一時合族公憤處以家法致死該地方官審明所犯確有應死之罪將爲首者照罪人應死而擅殺律予杖若罪不致死將爲首者照應得之罪減一等免其抵償若本人並非兇悍不法無過犯實蹟而族人誣捏毆斃者將爲首之人仍照本律科斷從之○癸酉召伊都立來京調布蘭泰爲江西巡撫以王國棟爲湖南巡撫由浙江觀風整俗使遷○命浙江布政使許容以原銜爲浙江觀風整俗使以孔毓璞爲浙江布政使由江南蘇松道遷○調憲德爲四川巡撫馬會伯爲湖北巡撫○甲戌以傅泰爲戶部右侍郎由副都統遷○乙亥以雲貴總督鄂爾泰勦撫烏蒙鎮雄土府有功賞加二級並給拜他喇布勒哈番世職○兵部議准雲貴總督鄂爾泰奏貴州安順州四面環夷五方雜處請立安順一營設守備一千總一把總二將壩陽石頭寨黎兒哨山

京四汛歸併管轄卽移四汛兵三百二十名分防汛守並移安順府經歷一員兼巡檢職銜駐安順州城內專司查緝從之○丙子添設湖北漢陽縣漢口鎮巡檢一○已卯刑部議覆福建巡撫毛文銓奏鹽梟彭瑞仁等致死鄭建如一案查彭瑞仁拒捕殺人明係大夥私販應令該撫訪拏夥黨並將失察各官查參得旨部駁甚是毛文銓前任貴州巡撫時朕聞其全不實心任事降旨調回時因福建巡撫員缺朕見毛文銓奏對明白且歷外任已久因諄切開導冀其懷改前非伊亦感悔流涕是以授爲福建巡撫詎意下愚不移到任之後沽取虛名一切刑名錢穀事件全不實心辦理以致地方姦徒橫行官吏恣意作弊倉庫亦多虛懸每次陳奏事務俱屬虛誑枝梧朕燭照其奸屢加訓飭今又以私梟拒捕殺人案爲零星小販不究訊夥黨查參失察各官似此曲法縱姦大

負委任之意有玷封疆重任甚屬可惡毛文銓著解任留閩將此案務須據實審明定擬具奏○甲申以署兵部尙書黃國材辦理刑部尙書事工部左侍郎鄂爾奇協辦刑部事務

六月丙戌朔諭內閣近有不法匪類造作訛言一人煽惑眾口喧騰以致人心驚惶良民受累如京城之訛傳挑選秀女賜西洋人浙江之謠傳海甯屠城此必姦惡之徒不肯改過遷善怨朕約束懲治甚嚴故肆其鬼蜮之伎倆搖惑眾心以希朕之畏而中止此則大誤矣朕非庸懦無能之主也如京城造言之人見在拏獲按律治罪惟是百姓等一聞浮言遂爾倉皇失措皆由平日不知朕之存心故易爲所動在姦民固罪不容誅而小民無識亦殊覺愚而可憫也朕自臨御以來日夕憂勤惟以愛民爲念凡所行之政所發之令無一不準乎天理體乎人情多方籌畫委曲周詳愛我

百姓實懷父母保赤之心恩勤惻怛出於至誠若有一毫不便於民立即措置得宜務使安居樂業無一夫不獲其所故地方一有不肖官員不法姦民定加懲治蓋恐姦邪一日不去良善一日不安且亦欲令姦邪改過自新同歸於善此一片真誠愛民之苦心

上蒼

后土

聖祖在天之靈鑒之凡我赤子宜無不昭然共

見假如偶有傳聞其事若不合乎天理人情卽應度理揆情以爲此斷非我主上所行者果如此深信不疑縱使無稽之言百端傳播亦付之不聽而消歸烏有矣浙江風俗向來澆薄士子不守禮教勢豪欺壓鄉閭恣意橫行罔知國法不得不嚴加整飭使惡黨潛蹤愚民安堵此更朕保護浙人之舉並非棄之於化外俟能改行率德之時朕自仍沛恩膏也總之姦惡之人豈不畏死謗國害民法所不宥嗣後該地方有司務期密訪嚴拏立置重典凡爾遠

近良民當共信朕斷不肯爲累民之事一切浮言彼此相戒勿聽則俯仰順適寤寐安舒永無倉皇失所之慮庶不負朕勤民保赤之心而姦惡不法之輩亦無所逞其伎倆矣著將此發與五城順天府及各直省督撫轉行各州縣刊刻頒布務期遠鄉僻壤咸使聞知○河道總督齊蘇勒會同西安巡撫法敏山西巡撫德明署山東巡撫塞楞額副總河嵇曾筠河南巡撫田文鏡遵旨查奏黃河徵清各省起止日期陝西山西於雍正四年十二月初八九等日起至五年正月十二三等日止河南於十二月初九日起至五年正月初十日止單縣於十月初九日徵清十六十七十八等日徵清徹底至二十二日以後復舊江南於十二月十六日起至二十三日止此見黃河徵清自上而下也再查河清於江南之桃源而止十二

月二十三日桃源以上迄於河南交界始見濁流白是而接壤之界以漸復舊最後山西陝西於正月十二三等日止此見濁流復舊自下而上也計陝西清三十六日山西清三十五日河南清三十一日山東單縣清十四日江南清七日實爲千年之嘉應報聞

○署湖廣總督福敏參奏虧空社倉穀石各員請分別議處得旨社倉之設所以裕積貯而備緩急朕御極以來令各省舉行曾屢頒訓諭務俾民間踴躍樂輸量力儲蓄不可繩以官法誠以官法相繩則勉強催迫轉滋煩擾惟期設法開導使眾樂從不至一毫擾累乃爲盡善也數年之內各省督撫奉行最力者惟湖廣總督楊宗仁今據福敏陸續盤查具奏前來始知原報甚多而見貯無幾此中情弊想因不肖有司侵蝕入己或那移以掩其虧空又或楊宗仁銳於舉行而各官迎合其意虛報穀數以少爲多均未可

定總之舉行社倉之法其中實有甚難者我 聖祖仁皇帝深知其難是以李光地奏請而未允張伯行暫行而卽罷此實事勢使然也以民間積貯言之在富饒之家自有蓄積雖遇歉收而無藉乎倉穀則當輸納之時往往退縮不前至貧乏之家仰給社倉固爲殷切而每歲所收僅供生計又無餘粟可納以備緩急此責諸民者之難也至於州縣官實心視百姓爲一體者豈可多得今以常平之穀爲國家之公儲關繫己身之考成尙且侵欺那用虧空累累况民間之社倉安能望其盡心經理使之實貯以濟用乎朕之舉行社倉實因民生起見又諸臣條奏多言之鑿鑿是以令各省酌量試行以觀其成效何如並非責令一槩施行也湖廣社倉虧缺之故卽交與福敏悉心清查儻穀已如數交倉而州縣侵蝕那移忍以百姓豫備之需充一己之私用者著卽於原侵那之州

縣名下嚴追賠補或民間原未交倉或交倉之數與原報之數多寡不符者若必欲令民間照數完納恐小民力有未敷未免竭蹶非朕曲體民隱之意福敏辦理此事必須至公至當方於吏治民生兩有裨益也自古有治人無治法必有忠信樂善之良民方可以主社倉之出入必有清廉愛民之良吏方可以任社倉之稽查各省官民果能實力奉行而善全無弊朕實嘉之至於繩以官法而好尚虛名則有司奉行之不善負朕本意矣○丁亥諭內閣學政一官所以化導士習養育人材職任甚重近年以來各省督學諸臣頗能仰體朕心祇遵朕訓矢公矢慎杜絕苞苴深可嘉獎但向來學政恣行貪劣以國家興賢造士之途視爲射利營私之地此固本人之不肖而亦大半由於提調官員贊成之也其學政之秉心貪劣者與提調官通同作弊固不待言而學政之可與爲善

可與爲惡者提調官則引誘之或挾制之使不得全其操守而於其中網取厚利此提調官之惡習而天下之所通知者也學政原有關防若提調官持正秉公則學政必不能肆行無忌學政果能公明廉潔提調官更當敬禮而玉成之豈可反導之爲非乎提調與學政相爲表裏嗣後學政聲名不好應將提調官一併議處其如何定例之處著九卿會議具奏尋議學臣考試凡關防啟閉以及拆卷發案俱經提調官之手如有通同作弊者應照貪官例革職提問如學臣私鬻名器提調官防範不嚴照溺職例革職如有胥吏招搖受賄等弊提調官不行訪拏別經發覺照失察衙役犯贓例議處儻學臣操守清廉提調官反爲引誘挾制者准學臣卽行指參照貪官例治罪從之○己丑諭內閣朕所交事件甚多諸大臣因何不行覆奏若事不可施行應將不可施行之處聲明具

奏朕不憚暑熱竟日坐勤政殿竟無事辦而諸大臣如此因循不奏其意將誰諉乎著內閣將朕交與各該處一切事件俱查明具奏嗣後奉特旨所交事務並揀選引見人員等事著該處每月將已結情由聲明交送內閣於月底彙奏尋議臣等遵旨行文各部院衙門將一切事件每月聲明已結未結情由送閣彙奏外其內務府另設有御史應仍交該御史稽查步軍統領所辦之事與別衙門不同應行交步軍統領奏聞八旗向有當月人員應交當月之都統副都統等查奏得旨步軍統領衙門事件亦著派滿漢御史各一員稽查辦理○辛卯諭內閣常平倉穀乃民命所關數年以來朕爲此事宵旰焦勞諄諄訓誡若地方大小官員苟有人心斷不忍置之膜外查福建通省應貯米穀共一百七十八萬石爲數可謂足矣乃上年稍覺歉收米價略長而地方大小官員與兵

民之心皇皇以缺米爲慮彼時朕卽疑閩省積貯之數必有虧空故地方情形若此也近聞閩省各屬倉穀錢糧虛懸甚多有銀穀兩虧者有無穀而僅存價值者至於實貯在倉者則十無三四毛文銓身爲巡撫奉朕面訓切諭乃將無作有捏稱實貯在倉敢於欺罔且忍以百姓性命之所需供屬員之侵那作弊負國負恩莫此爲甚向來直隸江西二省倉儲不實經朕特遣大臣前往逐一清查並遴選人員命往將虧空之州縣官卽行更換是以二省倉穀漸次清楚今閩省積弊若此亦當特遣大臣會同新任巡撫常賚將通省倉穀秉公據實一一查清其揀選府州縣等官著卽帶往並前所發人員遵照諭旨分別題補委署如有查出虧空之州縣並失察之知府等官卽將伊等解任審追其員缺將前後命往人員應題補者題補應委署者委署務期徹底澈清不使絲毫蒙

混以副朕察吏惠民之至意○癸巳諭內閣倉場米石乃國家第一要務試思此項米石民間輸納何等辛苦官員徵解何等煩勞糧船運送京師何等繁難一顆一粒皆當愛惜不忍輕忽朕爲此時加訓飭曾降旨令修理倉廩不惜多費帑金務期完固托時陳守創身爲倉場侍郎自當仰體朕心悉心料理昨朕特遣大臣等前往查看京通各處倉廩屋瓦滲漏牆壁損壞者十居八九所貯米石漸至潮溼霉爛夫以如珠如玉之米糧而視爲泥沙棄擲忍心害理莫此爲甚若不嚴行稽查無以儆怠忽而清弊端在京十倉每倉派都統或副都統各一員御史中不論滿漢每倉各派一員專任稽察之責所有米石出入支放奏銷事件仍屬倉場侍郎管理其房屋滲漏牆垣損壞與倉內鋪墊及匪類偷竊一切情弊俱交與派出之都統副都統御史稽察遇有查出之處卽行知倉

場侍郎若倉場侍郎等不卽辦理妥協致遲延著都統副都統御史奏聞儻有應行查出之處不行查出將缺少米石著落倉場監督等官與派出之都統副都統御史分賠其通州三倉交與通永道通州副將稽查亦照依京倉例行○諭福建通省倉穀虧空甚多巡撫毛文銓扶同欺隱經朕訪問確實特遣大臣前往盤查務令徹底澈清顆粒無虧以備民間緩急之用朕之爲閩民籌畫者可爲殫心竭力矣但恐不肖有司間欽差將至向紳衿富戶那移借貸以掩飾其虧空之項而紳衿富戶或畏其威勢或迫於情而不得已代爲應付以圖彌縫於一時均未可定朕此番差遣大臣清查斷不容有絲毫混隱匿且揀選府州縣等官多員令帶往更換是見任者必去而接任者新來儻紳衿富戶等一將貲財穀米借出便成官物用是特頒此旨明白曉諭俾勿墮貪官劣員

之術中使地方積弊永除而後任官員亦共知儆戒不至仍蹈前轍著將此通行福建郡邑鄉村咸使聞知○議政王大臣等議奏隆科多私鈔 玉牒存貯家中及降旨詢問又不據實具奏應俟辦完鄂羅斯疆界事件將伊革職拏問治罪得旨爾等所議俟隆科多辦完鄂羅斯之事再行拏問甚非朕意朕從前差隆科多前去並非不得其人以其能辦理而使之也鄂羅斯事件最易料理特給伊效力之路以贖罪耳乃隆科多去後看其陳奏一應事件不但不稍改伊之兇心逆行且並不承認過失而舉動狂悖全無愧懼將朕降旨行文查問之事隱匿巧飾無一誠實之語伊既不實心效力則留伊在彼處反致妄行攪擾毫無裨益可將隆科多調回令其速來未到京以前爾等請旨鄂羅斯邊疆等事著克什圖前往與四格圖理琛辦理○命廣東巡撫楊文乾浙江觀風整

俗使許容吏部郎中鄂彌達內務府員外郎伊拉齊往福建會同
巡撫常賚盤查倉庫錢糧○丙申 御製黃河激清碑文勒石於
江南清口河南武陟縣河神廟○何國宗緣事降調實授任蘭枝
內閣學士○蘇祿國王蘇老丹臣毋漢末毋拉律林表言臣僻居
荒服遠隔神京幸際昌期末由趨覲邇來天無烈風淫雨海不揚
波知中國必有 聖人臣捧閱歷朝紀事原有觀光之例是用遣
使臣龔廷採阿石丹奉臣赤心仰陳彤陛敬獻本國所產土物聊
效野人負暄之意得旨蘇祿國隔越重洋未通職貢今該國王輸
誠向化遣使遠來進貢方物奏辭懇切具見惻忱其有應行議奏
之處著大學士九卿詳議以聞尋議東南海外諸國琉球荷蘭安
南暹羅初次奉表納貢頒敕諭一道卽令來使齎捧還國其使臣
賜宴頒賞遣官伴送今蘇祿國初次奉表稱臣納貢應照例行以

示嘉獎從之敕諭蘇祿國王母漢末母拉律林曰朕惟職貢虔修
爲臣輸忠之大義寵施宏普大國柔遠之常經越重海以瞻雲識
嚮風之有素宜加賚予以勵盡誠爾蘇祿國王母漢末母拉律林
屬在遐陬克抒丹悃敬恭遣使梯航不隔於滄溟懇切陳詞琛贄
並將其方物慕義之忱良可嘉尙是川降敕獎諭並賜王文綺器
皿等物王其祇受益矢恪恭副朕眷懷至王所請貢期念爾國遠
在重洋往來迢遞酌俟五年之外一修歲獻之儀若王有所敷陳
則隨時上達故茲敕諭○戊戌解法敏任以張保爲陝西西安巡
撫西琳爲刑部右侍郎由御史遷○解塞欽任以碩色爲陝西西安按
察使由戶部員外郎遷○解積善任以柳國勳爲江西按察使由湖北鹽
○庚子諭內閣盛京甚屬緊要兵民旗人最多且地方遼闊十三
城相隔七八百里將軍副都統俱駐紮盛京內地教訓整理不能

周到朕意當照船廠甯古塔白都納例各設副都統一員管理自
廣甯義州錦州甯遠至山海關設副都統一員復州熊岳南金州
鳳凰城岫巖旅順等處設副都統一員令其分轄管理一切事務
教訓眾人改易陋俗當有裨益再開原與船廠相隔六百餘里自
開原押送發遣犯人官兵往返行走月餘甚屬勞苦聞得從前議
於船廠開原適中之地在克爾素驛站左右酌設官兵因與圍場
相近恐禽獸駭逸而止今查此處雖近圍場仍是大路可以安設
官兵惟當禁其駭散圍場耳但必須相視膏腴可耕之地令其永
遠居住則押送發遣人犯往還可免勞苦矣著議政王大臣詳議
具奏尋議盛京將軍及副都統俱在一城駐紮十三城相距遼闊
應於錦州及熊岳地方添設副都統各一員卽於盛京副都統二
員內移駐錦州一員其熊岳一員交兵部照例奏請補放見今熊

岳錦州俱有原駐之官兵毋庸另議至開原船廠相隔六百餘里押送人犯官兵往返勞苦應於適中之地酌設佐領二員驍騎校二員兵一百名查船廠將軍屬下有佐領四十五員驍騎校五十員兵三千三百餘名應卽於此項官兵內有孤獨情願移駐者令其移駐並令該將軍親往相視地勢不得駭散圍場其官兵駐住房屋照例料估奏聞從之○封誠親王允祉子弘景爲鎮國公○召趙殿最來京以李蘭爲湖南按察使

由江西糧道遷

○辛丑諸王滿漢

文武大臣合辭具奏蘇努悖逆妄亂其子孫俱應照叛逆例正法

上召入王大臣等諭曰蘇努雖已削籍離宗然原係宗室之人

爾等請將伊之子孫照叛逆例治罪是其子孫俱應卽行正法此事甚有關係爾等具本之時隨眾列名或不便獨抒己見今朕特命爾等入見面加詢問 天地 祖宗照察於上爾等眾人中或

有一人意見不同可卽於此時據實面奏事之是非君臣共之儻有不應誅戮之人加以誅戮使朕有用刑不當之名實爾諸臣之咎若諸臣心有所見藏匿於中將來必受蘇努之禍卽己身倖免其子孫受禍亦必與蘇努之子孫同爾等思之慎之諸王大臣會奏云蘇努罪大惡極今又查出 聖祖仁皇帝硃批奏摺蘇努敢於 御筆之旁狂書塗抹臣等將伊子孫請照叛逆例治罪實屬至當 上又問滿都護查弼納之意以爲何如亦俱奏稱應照叛逆例治罪 上諭曰觀滿都護今日光景似出實心至於查弼納欲將蘇努子孫盡行正法其心較眾人更爲迫切眾人所執者國法而查弼納所懷者私心也蓋查弼納與蘇努旣固結於先惟恐連累於後不若將伊子孫盡行剪滅永除己身將來之禍此情事之必然者卽此可見結黨之人事敗之後其同黨卽自相攻擊小

人情狀古今一轍也夫要結黨與平時未必得其相助之力及至有事反多一等操戈下石之流則小人結黨豈不無益而有大事乎而趨附匪黨之人平時亦未必得其援引之力及至有事豈能免於牽連卽倖而逃於法網而憂虞畏懼慚赧終身豈不可恥之甚乎滿都護查弼納與蘇努結交前後情形如此爾等諸臣深知日覩皆當以此爲戒諸王大臣參奏之本著交三法司定議具奏○壬寅諭內閣近因考試新科進士以宋儒所云士人當有禮義廉恥句爲論題諸進士試卷進呈朕躬自披覽見其文藝之工拙優劣固有不同然大槩皆詞章記誦之常談未能真知題中之理蘊而實有發明蓋所言止於儀文末節而已非禮義廉恥之大者也朕則謂人言禮義廉恥國之四維者蓋以天下之大四海之眾皆範圍其中而不可須臾離而士人貴有禮義廉恥之說所指甚

遠所包甚宏上之爲人君下之爲人臣皆當求其大者以爲務而不可局於儀文末節閒也以禮言之如化民成俗立教明倫使天下之人爲臣皆知忠爲子皆知孝此禮之大者也進退周旋俯仰揖讓此禮之小者也以義言之如開誠布公蕩平正直使天下之人無黨無偏和衷共濟此義之大者也然諾不欺出入必謹此義之小者也以廉言之理財制用崇儉務本使天下之人家給人足路不拾遺盜賊不生爭訟不作貪官猾吏無以自容此廉之大者也簞食豆羹一介不取此廉之小者也至於以恥言之爲人君者憲天出治誠和萬民則當以一夫不獲其所爲恥爲人臣者行義達道兼善天下則當以其君之不爲堯舜爲恥若夫鄉黨自好不失言於人不失色於人此乃恥之小者耳欲爲君盡君道欲爲臣盡臣道而其道不外禮義廉恥之四端士人者以天下爲己任其

身既爲臣之身而有致君之責者豈可徒知其小節而不知其大者乎夫禮義廉恥由一端之小者擴而充之可以保四海然必知其大者而務之自可不遺於其小若或徒規小節而不知其大則迂拘曲謹止圖檢束一身而不敢任天下之重此則細民之行而非士人之道也孔子曰人能宏道非道宏人其可不勉自奮勵乎朕見新科進士時卽欲面加訓諭因天氣炎熱恐伊等暫時跪聽不能悉心領會今特詳爲宣示朕願與大小諸臣交相儆勉詳思禮義廉恥之大者身體力行則人心風俗蒸蒸日上而唐虞三代之治庶幾其可復見也○癸卯諭吏部各省官員數年以內已經該督撫隨時舉劾今屆三年大計之期著停止一次○乙巳塞爾圖緣事革職以德明爲刑部尙書覺羅石麟爲山西巡撫富貴爲安徽布政使

由貴州按察使遷

○丁未諭內閣昔年曾奉

聖祖仁皇帝

諭旨海外噶喇吧乃紅毛國泊船之所呂宋乃西洋泊船之所彼處藏匿賊盜甚多內地之民希圖獲利往往畱在彼處不可不預爲措置隨經廷臣與閩廣總督議令內地之人畱在外洋者准附洋船帶回內地奉 旨准行在案此乃 聖祖仁皇帝綏靖海疆且不忍令內地之民轉徙異地實仁育義正之盛心也但數年以來附洋船而回者甚少朕思此輩多係不安本分之人若聽其去來任意不論年月之久遠伊等並無顧忌輕去其鄉而飄流外國者愈眾矣嗣後應定限期若逾限不回是其人甘心流移外方無可憫惜朕意不許令其復回內地如此則貿易欲歸之速不敢稽遲在外矣將此交與高其倬楊文乾常賚悉心酌議並如何定限年月之處一併詳議具奏尋福建總督高其倬遵旨議奏康熙五十六年定例入洋貿易人民三年之內准其回籍其五十六年以

後私去者不得徇縱入口久已准行在案又見住外洋之船或去來人數不符或年貌互異者卽係頂替私回應嚴飭守口官於俸船回時點對照票細加稽查如有情弊將船戶及汛口官員分別治罪至閩粵洋船出入總在廈門虎門守泊嗣後別處口岸樂行嚴禁得旨康熙五十六年定例之時隨據福建等省奏報回籍者幾及二千餘人是出洋之人皆以陸續返棹而存畱彼地者皆甘心異域及五十六年以後違禁私越者也方今洋禁新開禁約不可不嚴以免內地民人貪冒飄流之漸其從前逗畱外洋之人不准回籍餘依議○以玉田縣河決損民田廬發帑金二萬兩賑之○隆科多緣罪革爵以其弟慶復襲一等公○戊申解江苞任以張允隨爲雲南按察使由糧道遷○壬子復設湖南靖州州判一○癸丑諭內閣倉場米石乃國計民命所關顆粒皆當珍惜必廢座堅

完米粟方不至於霉爛朕宵旰勤勞百計經營布置卽如廩底之板四圍之牆不惜數十萬帑金剏造修整則身任倉場之責者自當加意慎重以仰副朕懷托時陳守創身任倉場全不實心料理以致倉廩損壞滲漏處凡九百二十九座米粟竟有霉爛者托時陳守創並無一語奏聞甚爲溺職著將托時陳守創及各倉滿漢監督盡行革職解任御史殷式訓專司查倉之責乃敢扶同徇隱亦著革職解任凡各廩座損壞滲漏之處俱著動支正項錢糧修理若仍交與舊任各官必致苟且塞責虛費錢糧不能實在完整著欽差都統御史通永道等同新任倉場侍郎監督官員實心料理務期完固仍著托時陳守創殷式訓及解任之舊監督一同看視每倉修理動用錢糧若干著本倉監督與托時陳守創殷式訓分賠補項霉爛米石亦著伊等照數分賠其舊任監督著議政王

大臣會同大學士詳加訊問如有本倉廩座全無損漏者仍畱原任將新補監督撤回如從前曾將滲漏之處詳報倉場者著將情由聲明奏聞吏部右侍郎岳爾岱順天府府尹劉於義著補授倉場侍郎順天府府尹事務著左僉都御史申大成暫行署理○裁陝西甯夏府玉泉倉大使一○予故致仕湖北巡撫年遐齡祭一次○甲寅調圖理琛爲吏部右侍郎轉永壽爲兵部左侍郎以那蘇圖爲兵部右侍郎

由鑒儀使遷